

權載之文集

三

開化圖書館  
kaichua library

開化圖書館

Kaishua library

開化圖書館

Kaikhwa library.

開化圖書館

Kaishua library

權載之文集卷第十四

唐權德輿字載之

碑銘

唐故中書侍郎同中書門下平章事太子賓客

贈戶部尚書齊成公神道碑銘

并序

有唐文學政事之君子曰相國齊成公諱抗字遐舉清  
方粹溫絜矩秉彝明誠盡性切劇化育之道精義入神  
旁魄天人之際以忠事君以病乞身乃去台宰乃儕商  
皓然後撤琴啟手足歿齒無違德以從先大夫於九原  
易名曰成不亦宜乎公某郡人自太公表東海桓公匡

天下爲國爲家或哲或仁烈祖贈太師府君諱澣歷給事中中書舍人吏部侍郎止於平陽太守出入陟降中行山立至今言開元名臣者稱公有遺直遺愛焉實生先公贈國子祭酒府君諱翽履道貞厲仕至左龍武軍倉曹積厚於上流光於下其位不充故大受於成公公旣齟而孤哀過成人屬幽陵橫潰中夏如燬奉太夫人安輿違難於越得子州支伯之故地而偕隱焉誅草茅以順居息悅山水以資仁智方茂天爵用觀靈龜嘉招重問奔走以狎至虛已宏道從容而翔集吳郡張相君鑑方以仁義理濠上得君爲榮及進律於洪成師于岐

累爲命介若驂有靳建中中戎王請大和會以休寧西  
方扶風綿亘汧隴地當甌脫且有成命正其經界公實  
佐中權登壇涖盟得其情數與之約結克就衣裳之會  
用銷邊鄙之警自解巾三遷至殿中侍御史俄屬涇旅  
竊發羣凶挺災天子展儀於甸內主公死難於理所百  
舍奔問至於行宮拜侍御史有詔以蕭黃門復布愷澤  
於東夏命公爲工部員外郎以贊焉復命轉倉部郎中  
李懷光阻命於蒲連兵未解關中饑旱經費不足轉粟  
饋軍濟時之艱患求才急病命使以專達遷兵部郎中  
兼御史中丞以董其任俄拜諫議大夫當軸者不相容

坐婚親細故出爲處州刺史先是山越寇攘蕩覆城寺公乃卜勢勝之爽塏因習俗之便安三時不害百堵皆作朝典陟明拜蘇州刺史吳實劇部大田多稼浮徭冒役吏禁或弛占著名數戶版不均公乃閱其生齒書其比要強家大猾不得蓋藏介持單輕與之紓息已日乃孚厥猷茂焉遷潭州刺史御史中丞湖南觀察使以向時二郡之理而宏大之其仁可知也左曹理本徵爲給事中周郊寄重擢爲河南尹盜有宋瞿曇者白晝椎剽爲羣偷囊橐三川病之幾三十年公法令嚴具網絡張設名捕魁宿使無遺類指顧之間擒擿如神乃作秘書



章明文雅脩舊以起廢乃作太常統和神人節事以辯  
志便蕃大僚其道乃光德宗皇帝方以堯舜氏聰明之  
道馭天下用賢人充相位拜中書侍郎同中書門下平  
章事熙九功之歌質百官之成損益文憲化裁形器精  
微以折中密靜而不伐或事隱於造膝或言行於沃心  
初天官氏每歲表他曹郎二人閱多士試言第其甲乙  
春官氏俾考功郎選孝秀之親故者而進退之公以冢  
宰小宗伯爲官人取士之本蓋天子有司之重任於避  
小嫌亂舊章適滋岐旁孰謂局鑄蹇蹇坦坦之道豈如  
是耶然後闢康莊付衡尺遵公是之路去自便之私天

下之人謂之理道尋有詔修國史昔孔父無位以空文  
爲一王法公當盛聖之代用宰司惣直筆其於褒貶勸  
懼明焉勤慮盡瘁積成寢恙累章乞告改太子賓客遭  
罹不淑贈戶部尙書時貞元甲申歲夏四月春秋六十  
五夫人河南獨孤氏某官某之女賢明早夭繼夫人蘭  
陵蕭氏某官之女仁順有禮法嗣子餗銜恤毀瘠侍公  
裳帷以某月日祔於東都某原喪祭哀敬君子以爲有  
後惟公深而通肅而寬出處動靜必以中正敬用五事  
暢於四支資性儼恪尤長鑒裁在岐也薦齊忠公暎佐  
蕭也薦盧恭公邁皆至宰相其他推轂下士爲漢廷臣

成天下重名碩望者不可勝書凡所論著皆研幾析理  
宏雅夷遠洪州文宣王廟碑張蕭三相國碑誌本聖人  
教化之蹟推大政睿明之道固其性術講貫而發舒乎  
斯文文集二十卷中倫體要盡在是矣公薨五年餽調  
爲洛陽尉永惟先烈未刻豐碑以德輿夙承湖海之舊  
中忝掖垣之屬代日舉代靡形話言獲於遺編實見陰  
德顧茲無似有玷知人濡涕含毫以表幽宅銘曰  
昔在營邱大風泱泱有倬平陽令聲章章不踐宰政慶  
貽子姓倉曹含光大學追命厥生中書秉哲居正鵬起  
扶搖鸞翔慶霄乃登紫微以瑞清朝吉凶糺經寒暑結

輜其生有涯其用未極壽堂冥冥宰樹森植揭茲馨香  
終古是式

唐故中散大夫守尚書右僕射上柱國賜紫金

魚袋贈太子太保姚公神道碑銘

并序

公諱南仲字某吳興武康人姚虛媯水根柢峻茂後漢  
青州刺史恢始違難東徙周華州刺史北絳郡公僧坦  
以行義道術聞生二才子曰察曰最仕隋爲蜀王友王  
友六葉至公會王父績仕絳州曲沃縣令王父元宋州  
宋城縣令烈考發天寶中舉秀才十上不合慨然自奮  
從西平王哥舒翰於隴上積功勞至右領軍衛將軍他

日以公之勤贈國子祭酒公抗行厲操清方謙讓以規  
爲填以禮爲輿以多學爲富以不貪爲寶絜如大圭鑑  
若黃鍾宏毅以任重溫良而能斷自射策筮仕至於綬  
吉祿啟手足由是道也其初應制條對理道授太子校  
書內史吏師表其才能凡三結黃綬至萬年尉前後考  
課爲府中最擢拜右拾遺久次歷右補闕祭文石封阜  
囊諷議十年彌縫百度大厯中中宮憫冊旣卜壽原陳  
古義以上達疏近郊之非便卽日詔可下其章於宰司  
特超五階被以命服執事內詔以上賀近臣修職而競  
勸服薦紳者誦之執簡記者書之尋以本官充理匭使

今皇上嗣位之初慮化不下究以通邑長人導利之源  
出爲蘇州海鹽令韓晉公滉時愆方任延於幕庭改殿  
中侍御史興元歲大輅省方深燭理本柬求俊又徵詣  
行所泊清宮旋蹕拜左司員外郎紀綱品式練達明備  
轉兵部員外郎時武師告成禋沴肅清四征羣帥條上  
功級材官勇爵差次賞典受命顓達疇庸式敘遷本司  
郎中凶旱之後被邊艱食近關蒲晉十餘城之地因其  
徵令悅以平糴乃董使車贏糧息人拜御史中丞歲中  
換給事中正色匪躬清公不苛大朝以肅左曹亦理明  
年授同州刺史三載考績復以御史中丞領陝府長史

陝虢觀察使居五年就加右散騎常侍左輔有離宮公  
田之劇焉陝服居函關砥柱之衝焉於二千石元侯之  
選斯近而重賦政廉平馨香流聞以修班制以厚風俗  
上以靈昌居兩河之郊鄭爲支郡是皆要害且今勁兵  
處也自丞相魏國公政成入弼厥後守臣再物故而魏  
公之澤寢遠思得寬明忠智之長以輯柔之進公左散  
騎常侍御史大夫爲滑州刺史鄭滑節度使於是握兵  
符乘單車惠然簡易入布條職恤鰥寡用仁制強禦用  
明居常以柔克臨事以貞勝士吏悅勸夫家寬息阜俗  
成師納忠閑邪衆情皆懷而公益厲十六年介圭來朝

本軍之文集卷之六  
六  
牢讓師帥由是詔魏公以左僕射居相府命公爲右僕射以代焉公旣得請命其軍司馬盧羣以代焉爲仁由己是稱方國之表知臣若君乃膺師長之任詔奉常具儀法以莅中臺禮官贊引宰政爲客諸曹羅拜於堂下郎吏捧牘於階序禮成渥縟秉直者榮之虔奉朝請恪居官次慥慥然守業修職未嘗以耆碩尊禮自處山甫之匪懈考父之益恭古人與稽華髮彌固十九年秋七月乙亥感疾薨於宣平里享年七十五天子廢朝悼歎俾中貴人弔祠追命爲太子太師恩之所加可勝言哉惟公粹和而能貞厲恬淡而有儀矩履方持重坦坦光



大詩云愷悌君子求福不回言樂易而不違於道也又  
曰靖恭爾位好是正直言遭明君其道行也斯二者君  
子謂公得之夫人河南縣君元氏魏景穆帝之裔宣州  
錄事叅軍光宗之息女也和易淑柔以肥家道先公而  
歿十八年矣嗣子太僕寺主簿衮絜清好古誠信得禮  
與其弟亮茹毒問卜以閏十月己酉奉公之喪舉夫人  
之殯合祔於少陵原黃渠里以儉襄事率循家法雖宗  
姻四布皆泣而辭之且曰理命也猶懼先人懿實寢而  
不章刻茲穹石以永終古銘曰

黃目鬱器禮神所貴珮王金龜君子是宜秩秩姚公其

心秉彝抱義戴仁造次無違公之所履中立不倚廉車  
淑旂所向風靡政無吐茹道若砥石事君愛人斯謂至  
矣中臺崇崇端右宗公皇明嘉獎陟是師長卓爾道行  
倏焉化往少陵鮮原美禎新阡龜筮告猶塗芻儼然白  
驥蕭蕭黃渠潺潺姚公之德兮揭此貞堅

唐故太子右庶子集賢院學士贈左散騎常侍

王公神道碑銘

并序

興元元年春二月太子右庶子王公艱貞歸全於京師  
新昌里夏五月王師震耀禮沴銷散天子以公忠義風  
節可以聳厲人臣追命左散騎常侍且詔有司護葬加

禮冬十一月寧神於咸陽縣肺浮原先公之兆域旣葬  
十二歲其孤仲周以德輿昔在羈州獲見於公無容之  
敬嘗拜牀下乃泣狀代德俾表識於神道云公諱定字  
鎮卿京兆人其先魏信陵君無忌之後秦滅魏謂之王  
家周太尉尙書令羆以勲勞闕閔爲藩衛威重從太尉  
三代至隋司金上士沼相等七州刺史明明生進進生  
同州河西縣令喜喜生蒲州刺史贈禮部郎中慶慶生  
吏部侍郎揚州大都督府長史贈禮部尙書揚州大都  
督府易從積是德善叢滋章大公卽尙書第若干子弱  
冠游太學舉進士甲科補太子校書以文雅德器名聲

四暢屬執事者用喜怒爲刑賞上蔽天明婚親坐累微  
文痛詎厯湘潭藍山雲夢鹽城四邑之屬天寶末違難  
家食於淮湖間四征五府聘問狎至某年中書元載廉  
問九江表公爲介授左驍衛兵曹叅軍以疾乞告不屑  
就無何元拜小司徒執憲乘軺實顓徵令復表公爲大  
理評事捧詔踵門詞禮皆切不得已而從之恥驚功利  
每稽中正酌重輕之法通方圓之宜叩雖應於春容技  
寧投於肯綮纜逾旬朔復以疾辭時薦紳先生多游寓  
於江南盍簪清議以天爵爲貴退然絜矩名動京師宰  
司得君且務樹善俄除監察御史不樂拘肩換太子司

議郎公望寢盛徵書累下朝論以九遷是望大僚之七  
發相繼拜起居舍人尋加理匭使厯禮部吏部二員外  
於是昭法誠廣聰明裁百辟之章疏助九流之刀尺私  
回屏伏公是興行遷考功郎中每歲覆羣吏之能否書  
其上下之籍有司賦祿此焉質正吏詐諉以嘗巧法靡  
密而不勝公乃大爲之防盡去其弊是歲選部以稱職  
聞或賀之者舉手曰此考功之力也豈敢攘善尋以本  
官知制誥歲中遷諫議大夫掌誥如故且加命服凡贊  
書名命必輔以精識其旨在於擧菁華而去枝葉故簡  
實體要不爲曼辭明年幸臣伏法移太子洗馬今上嗣

統東求吏師授隰州刺史以南宮歸重尋拜吏部郎中  
再受面命循行方國初自淮淝至於汝南後自上黨亘  
於山東辯逆節以致誅宣王澤以宏化德立刑行時公  
之功遷太子右庶子集賢院學士或歎以才全位散非  
公所宜者公蹴然曰此予仲父之職官也竊懼不稱豈  
必使濡翼腊毒然後爲得耶明年冬上思避狄之亂王  
虬西狩公間挈二子奔扈行宮在途發疾爲凶黨所得  
不敢加害劫送京師元惡借公素名汙以右職桀友日  
至盜言孔甘不時赴就期以大戮公瞋目噤口其心確  
然私謂所親曰忘君恩以苟生非忠蹈賊刃以誅死非

孝於是藥攻六藏艾灼四支耗其神形終啟手足任重  
道遠君子以爲難前此理命其子曰吾嘗被冕服近天  
子之光不能酬恩刷恥而遭罹執劫得正而死猶生之  
年但慮竊國泉以賻我義無所受又勿使僞命汙吾之  
旂口占遺表言終而絕禮盛服充追崇身後君君臣臣  
其至矣哉故尚書吏部郎中趙郡李公洎公皆德輿先  
大夫之執也李公嘗稱公交道之深評議之正天下之  
人以爲知言前夫人京兆韋氏刑部尚書贈太子賓客  
堅之女繼夫人隴西李氏右金吾衛將軍安州刺史延  
業之女龍旗麟趾之慶鍾於淑哲皆叶公之志而先公

之歿長子逢以進士宏詞甲科歷咸陽萬年縣尉監察御史殿中侍御史佐制河東之畫才名休茂不幸早代幼子仲周亦以進士甲科使車交辟以廷尉評攝監察御史佐元侯外任實亦功利用敏識文行修明論譏先烈炳然詳實故採獲始終用成斯文銘曰  
大玉孚尹慶霄綢緼有倬王公清方直溫考績中臺吏理有倫密侍右掖化成人文時或屈伸道無緇磷別殿清近東朝顯尊盜泉滔天猛瘳狷狷不虧其全不害其人凜凜風節追崇厚恩密印金貂禔於墓門家法憑厚慶叢後昆纂敘清輝敬而不諛崗連夏屋木拱秦原傳



信貞珉令聲無垠

開化圖書館  
Kachua library

開化圖書館  
Kaihua library

權載之文集卷第十五

唐權德輿字載之

碑銘

故宣武軍節度副大使知節度事管內支度營

田汴宋亳潁等州觀察處置等使金紫光祿

大夫檢校尚書左僕射同中書門下平章事

使持節汴州諸軍事兼汴州刺史上柱國隴

西郡開國公贈太傅董公神道碑銘

并序

漢興五代孝武思理膠西相陳天人之際王道之端昌  
言大對統紀條貫純嘏積厚遠而寢明帝唐九葉順考

古道隴西公都將相之重承尉衛之崇啟心宣力作率  
慶事陟恪宗工能積其烈公諱晉字混成河東虞鄉人  
廉忠溫厚絜矩通理秉義以立故不爲利疚知動之微  
故每與吉會初肅宗受端命以合兵車思欲去元元於  
湯火致王度於金玉以文告威讓遠猷密命之爲重也  
故公解巾披荆校文視草凡三徙官被以采章代宗御  
天下乃清吏職以爲文憲彌綸陪貳事任百辟交修則  
理道洽故公再入御史府三爲尙書郎歷祕書監長府  
奉常武侯之亞今上建皇都以纂鴻業思代天工俾寧  
方內故公出入屯夷昭明有融中居大僚以至柄

用貞元五年春二月拜門下侍郎同中書門下平章事  
居五年除禮部尚書用者碩俊德轉遷兵部分正宏化  
以本官畢命爲東都留守東都畿汝州都防禦使安危  
注意以左揆持相印充宣武軍節度汴宋亳穎等州觀  
察處置等使十五年二月丁丑薨于位享年七十六罷  
朝三日追命太傅有司易其名曰恭惠職喪法賻皆峻  
筭等所以視其踐履而加優之也初公以祠部郎爲出  
疆從事北方之疆驕蹇沓貪伐功怙力徵我厚幣使臣  
指顧公攝其詞詞達氣直虜皆震伏輝威命於專對輝  
光華於外區仁者之勇沛然餘力其爲大府未浹日而

理乃珥貂蟬實兼憲丞含章以承顧問秉直以司紀律  
修起故事京師肅然其爲華州徵赴行在以祭酒亞相  
使于北河其往也薊門不出關東多壘習俗故態且相  
附離公則破其從約使循軌道其還也蒲坂旣阻王宮  
未清婪婪二逆恣睢相合公則折其兇謀因以鬱沒憑  
軾有勞扈蹕而旋益用尊禮大其職業司徼循也五校  
嚴備持重而不苛處綱轄也六職遵修舉直而不紊典  
禮樂也百神咸秩薦信而不黷其爲相也上戴元聖下  
熙百工柔惠小物協寧大政推明常古之制章叙理平  
之業粹和而不耀敬讓而不居言陳於前不可悉數拜

章八上然後得請其撫封也尤爲難理先是在宥推恩  
參授兵柄至有恃凶器以邀好爵者氣燄不還風波相  
泐是邦再亂人用恟恐上以爲陳留天下之郊也非素  
重臣不可以率先賦政公旣受命與一二從事記室儒  
服而前不待裏言不持扞衛寬信夷易闇然風行長城  
大蔡蘊在靈府悍將伏罪齊人樂業四隣諸侯折中於  
公居四年政成疾力累求入覲因條陳利病請制於未  
然上難其繼以至沒代嘻夫一邦之人得公而理失公  
而亂怯介夫殺大吏猶原潦川潰於不可遏向公之嘉  
猷密䟽如前知焉其明智歟董氏在春秋時書法不隱

在戰國時贊明命聞於諸侯自膠西而下淳耀滋大在  
魏有司徒昭在蜀有尚書令允扶義納忠以幹機衡其  
族舊矣公之曾祖仁琬皇梁州博士祖大禮贈右散騎  
常侍考伯良開州新浦主簿贈尚書右僕射三代有令  
德而無貴仕蕃祉所鍾發爲追崇宜哉有子四人秘書  
省著作郎全道秘書郎溪大理評事全素太常寺太祝  
澥等其承學也專其就列也敬斬焉而孤纍然以哀日  
於先遠象數協吉以其年十月丁酉奉理命家法薄葬  
公於河南縣萬安山之原以前夫人南陽張氏繼夫人  
京兆韋氏祔焉從周禮也惟公自筮仕至捐館四十五



年無伐善無違德歷官三十六皆以理効聞自建中以  
還居中分閭再調鼎實一人而已范文子所謂唯厚德  
者能享多福惟公有之全道等猶懼懿鑠之不永于後  
與陵谷之有遷也以德輿奉行公之命書者三宜金石  
刻故跡其誄謚而爲之銘其詞曰

后王財成雋乂昭明以建皇極甫申居內方邵理外周  
邦是式於惟隴西求福不回文武宣力調和公餼整訓  
長轂柔惠且直膠西章章道可佐王屈相下國綿代儲  
慶至公乃盛位實配德子子干旃昔往浚都俗旣舒息  
翻翻素旗今旋洛師人用悽惻惟是壤樹資於四布万

安之側德輝在茲永代有詞于以篆刻

唐故四鎮北庭行軍兼涇原等州節度支度營

田等使開府儀同三司檢校尚書右僕射使

持節涇原諸軍事涇州刺史兼御史大夫上

柱國南川郡王贈司空劉公神道碑銘

并序

維南川郡王諱昌字公明貞師于安定十六歲歲直鶉  
火夏五月甲子寢疾病考終命制誥祿以司空印綬而  
弔祠法賻稱焉於是內子諸孤宗姻家老盡誠信於內  
從事大吏倫侯亞旅展匍匐於外叶志會事拂龜露蒼  
象數皆得條陳纖微必蒙於可報以冬十月丁酉返真

宅於京師某原禮也公之先彭城人楚元王交之後憂  
國公宏基之族孫也大王父全慶皇汴州別駕王父達  
徐州長史父庭玉試太常卿贈徐州刺史三代醇靜不  
躋豐祿故天爵覆露發祥於公公角犀鸞領魁岸碩大  
思暮泉深盛氣陽休清明以虛受莊重而強立稟於端  
誠之謂義發於慮憲之謂行顯揚天聲之謂武節修方  
任之謂文事再居陪卿三佐列藩以官尹中執法以騎  
省亞丞相冬官宗伯比踐六職再受鉞而一撫封列王  
爵食真賦終於端右飾以論道其初守商邱援彭城下  
濮陽壁寧陵釋陳圍復梁野皆急病肆力成功自著起

沮傷以奮擊化恠駭爲休寧其守不可拔其功不可遏  
投艱而智勇俱殖酣戰而奇正合發兵法曰有必勝之  
將書曰存亡在所用其信然乎始從河東節度張介然  
東討林胡殺畧居多次從宋州刺史李岑扞城半歲劇  
賊遁去又從臨淮王光弼汧國公勉每用上効楊于軍  
鋒洎劉司徒元佐始權節旄錫宣武之號以族屬勲力  
賈餘無前凡希烈之自寧陵走汴自汴走蔡以至于死  
皆公之爲貞元三年以偏師八千承諾護塞亦旣旋師  
俾營甸圻有尤違者連斬以徇天子壯其忠槩未幾徵  
還沃心前席享醴命宥建行師之節制自稟新書分上

相之賦輿留屯便地明年正月進律作藩彤弓元甲物  
采備厚因六郡之氣俗用十連之教理入覲宣室請城  
平涼屹爲巨防乃拓故地而又險走集以禦寇徙邑居  
以便人夷境塙而制井疆斬荆棘以列達市貨力具舉  
農戰交修邊關弃地晏然富殖長幼養老沛然生聚隣  
有墜師者濟之弃甲者納之凡涇人之所未習者皆優  
之爲涇土之所未產者皆茂遂之昆夷攝驚燿火訖息  
彼西土軌道繫吾謀實然理民不忘於信賞遺章備見  
其忠悃年止六十未極壽寵皇帝之所以恤然加等良  
有以焉夫人吳國夫人陸氏柔嘉綢直婦道明備長子

殿中侍御史贈潁州刺史均教忠能仕不幸早夭嗣子  
右威衛騎曹參軍士涇懋善有馴行與支子右衛率府  
兵曹參軍士倬洎士良及士和等以德輿嘗受面命類  
涇人聲詩馨香始終其傳信也熟將篆樂石載徵菲詞

曰

亶亶南川得時經武大君有命式是西土西土濯征衆  
心成城壽甲瑯戈涇師以貞隼旗驚冕涇俗以寧肆厥  
忠力秉茲義程凡在五符至於白徒制爲日廬亦有賈  
區實墉實畝交贊令圖嘉生油油比屋愉愉昔誓偏師  
士皆致果如使臂指可蹈水火孰云危事決勝在我狂

瘳內訶惡氣濛濛濁河而南或守或攻陳壁旣捷夷門  
乃通時惟南川實冠羣公乃分兵符乃鑿鑿器服物昭  
庸天休滋至勞勤心力宏大功利師則嚴終公惟盡瘁  
智氣冥冥發揚昭明下平水土上助威靈輅葆參差封  
邱崢嶸立此堅石於昭厥聲

唐故劔南東川節度副大使知節度事管内支  
度營田觀察處置靜戎軍等使光祿大夫檢  
校尙書左僕射使持節梓州諸軍事兼梓州  
刺史御史大夫鄭國公贈司空嚴公神道碑

銘

并序

昔周以淑旂錫韓侯奄受北國晉以黼冕命士會乃將  
中軍惟鄭國嚴公諱礪字元明再總方任實顯兵柄采  
飾昭融與功化俱初公從祖兄太師馮翊忠穆王政成  
于梁勲在盟府公以支郡二千石護和門賦輿太師旣  
歿德宗命公爲代於是都尹守開幕庭佩亞相之印綬  
建元侯之麾節守之以義和之以仁器局宏厚姿儀碩  
大每務根本不沽名聲勤身七歲績用大洽優詔就加  
禮部尙書永貞紀號并絡上變軍司馬因守臣之喪席  
凶器以要好爵而又劫蜀人圍梓潼天子旰食西南愁  
擾公毅然飛章條上方畧請以漢中之師率先進取畫



山川之阨塞調餽饋之名物出其不意可以鼓行嘉猷  
急病慷慨忠壯實蒙可報克厭帝心乃命將嚴秦授以  
機畧自漢源至神泉凡數十合其間下劔門覆盪口收  
劔川破契丹命禪校可提彌誅斬虜之特將文德昭然  
後分秦險阻潰其心腹或設伏以遮擊或出奇以夾攻  
我常賈餘而虜始奪氣以至于援鹿頭清岷峨旋禁旅  
於天上快靈誅於闕下賦車馬以懸束備糗糧以飛輓  
慮之於始倚以成功故墨詔曰士季定尅蜀之謀叔子  
建平吳之策惟君知臣其至矣哉公博貫書術研機易  
象始以處士詣草堂禪師無相修桑門之法邦鄉督勉

甫釋巾褐爲梓州元武尉本道表爲遂州兵曹掾大厯  
中西戎不虔疆場大駭領偏師援灌口實茂厥勞謙卑  
不居建中末太師以藩衛之崇當孝文省方之運推擇  
從事導迎屬車豈伊異人在我族類拜大理評事充節  
度巡官儲待百年以奉行內轉大理司直改華州司兵  
參軍節度使李元諒署爲推官以憂去職旣除猶毀大  
師以武備爲重將才實難表爲太子司議郎兼監察御  
史左廣之戎政轅門之後奄無不綜焉俄拜興州刺史  
寬明簡惠以靖邊部居一年政成復修軍志終繼二馮  
之化而居八命之戶投艱履險勲伐章灼蓋裕於才能

而推於忠厚然也元和元年遷尙書左僕射三蜀旣平  
拜梓州刺史劔南東川節度觀察使且以資陽陽安等  
六郡四十餘城隸焉加地進律疇庸之典也四年感疾  
春三月甲申薨于理所享年六十有七追命司空弔祠  
有加嗣子天興尉公甫銜恤茹毒奉公之喪以其年秋  
七月辛酉葬于京兆萬年縣鳳棲原從象數之吉也惟  
公之先自兩漢二隱湛冥善閉會王父哲閱覽博古鬱  
爲聞人阜囊危言劇切后黨繇荆王府司馬出爲劔州  
刺史因徙家鹽亭而休老焉大父順恬淡不仕父審微  
義方貽訓聖朝以孝理天下贈工部侍郎公之諸祖父

或著作秘書侍講東朝或含章射策剖符居部羣從兄弟有太師之烈焉其他履臺郎二千石者率以才行自贊惟公以文無害厯掾吏部從事發揚武毅奮迅軍籍分闡授鉞爲時信臣循理遵職好謀善斷明利害之向習俗化之變司馬遷所謂扶義倣儻不令已失時其有功名也宜哉林鍾烝彝先古之制所以論次懿績章明永久門吏孝子之心也其可沒乎以德輿嘗志太師之墓亦草興州之詔耳目事實其詞不誣是焉篆刻以表神道銘曰

地中有水利用行師於惟鄭公藩屏清明蜀川橫潰人

用恠駭公披肺肝請掃蜂蠆賦車誓衆沐浴齋戒吉語  
日聞嘉猷是賴以犒以饋間關感槩如飛如翰輝燿宏  
大旣理漢中乃遷梓潼武以貞師文以撫封八旒七章  
旣長宗公乃倚乃伏如何不淑樹檀蒼蒼墓門肅肅立  
茲介石永表陵谷

關化屬  
kuanhua

權載之文集卷第十五

化國書館

Wanhua library

權載之文集卷第十六

唐權德輿字載之

碑銘

唐故楚州淮陰縣令贈尚書右僕射王府君神

道碑銘

并序

天球白珩產於崇山叩之而清越格人莊士生於積德  
用之而宏大其或含光不耀藏器不發乃熾而昌是滋  
百祥蘊而爲義方飾而爲徽章故太原王公四萃仕而  
領通邑五追崇而登端右循政茂於官下湛恩集於身  
後有繇然也公諱光謙字某自東漢鴈門太守澤五代

至晉中書令獻公坦之歲黉德名與吉祥侔盛自後魏  
龍驤將軍長社穆侯慧龍五代至隨祕書少監邵以勲  
華文學復大其門祕書生隨揚州戶曹參軍東戶曹生  
皇青州司戶參軍子奇司戶生美原丞贈太常卿慶賢  
三代沉晦邁其風訓公卽太常府君之長子也幼而岐  
嶷長而淳懿絜矩慎獨抱仁戴義閎深博辯之學稽古  
禮文之事炳然含章靡不通貫至若文舒之清修廉實  
處冲之剖析元微安期之宏恕懷祖之沈靜合是家法  
而躬行之始以門廕受署凡四徙官曰幽州三水潞城  
二主簿絳州萬泉縣丞楚州淮陰縣令所至之邦二千



石必加禮慰薦而公牢讓勇退卑不可踰又爲縣令也  
務清靜之理而去其煩苦推明誠之本而教以廉愧一  
同熙熙生殖阜滋楚風丕變幾至齊魯因喟然曰彼天  
爵美祿者在仁義與樽酒而已太邱彭澤豈多秩耶於  
是放懷於外嗇神於內沉研象繫之表磅礪天人之際  
其致知格物不可詳已以開元二十九年春正月捐館  
舍於淮陰年六十九其明年返葬於河南府偃師縣北  
山之陽夫人博陵崔氏贈博陵郡太夫人繼夫人隴西  
李氏後夫人同郡武氏贈彭城郡太夫人飾終三加子  
貴故也公之才子五人長曰翊以文雅典憲直方貞厲

歷御史中丞左散騎常侍刑部吏部二侍郎御史大夫  
贈戶部尚書謚曰忠惠次日翽吏理詳明官河南府陽  
翟縣丞次日翽循良愷悌勲德茂盛歷辰朗容三州刺  
史容管經畧使兼御史中丞河中少尹朔方節度留後  
汾州刺史單于副都護振武軍使徵拜京兆尹尋兼御  
史大夫再居大理卿爲福建州觀察使入爲太子賓客  
貞元十二年檢校禮部尚書東都留守踐履藩垣逾四  
十年階至特進爵封本郡次日向士行清修爲秦州上  
邽縣尉幼日翽文敏幹俗歷監察御史三原縣令著作  
郎太子僕翽向皆不幸早夭翽亦命屈其志而忠惠公

太原公摠集休祉爲宗公蓋臣初忠惠公與肅宗代宗  
從容言天下事甚衆且曰文致太平在正名百職危言  
悃悃痛詆權倖條䟽理道坦然章明沃心前席倚以爲  
相者數矣雖位竟不至而其遺風直聲暴乎天下太原  
公剖符賦政累刻金石滅夷越劇賊開地靖人倅蒲也  
以沉機銷急變護單于也以尺書柔獷俗中外官師淑  
聲流聞保釐尹正式是東夏安危注意未始有極言代  
德者以公之道未光而慶下鍾惟其有之是以似之之  
故也初以忠惠公扈鑾輅於岷峨其勤匪懈贈公隴州  
刺史又以持節印冊命專對於北方間關忠力再贈公

秘書監後以太原公南服嘉庸三贈公爲兵部尙書以  
轂下肅清四贈公爲太子少保以閩方報政五贈公爲  
尙書右僕射噫嘻賢人教忠之業令嗣揚名之孝大君  
追遠之澤是三者可謂至矣十七年太原公貞于龜筮  
得二月壬寅吉於是備八旒七章鷩冕佩玉之飾博陵  
彭城二郡太夫人以象服耐焉詔給鹵簿官司喪事慶  
靈集於一門光耀被於九原君子然後知積德豐報之  
不誣矣至若忠惠之子爲守臣太原之壻居台司諸孫  
昌阜冠聯圭組則列諸碑陰以備代家斷此琬琰銘公  
德善其詞曰

有斐君子兮德行醇備蟬聯叵赫兮峻閎宏義觀我靈  
龜兮懼腊毒之厚味樹風百里兮馳蒲密之極摯慈和  
安靜兮闔境如春仲曼容兮與古爲倫全才不耀兮流  
慶後昆忠惠旣沒兮太原顯尊五加追合兮賁此元壤  
隼旗龍劔兮以至師長澤流根兮恩漏泉壽堂拱木兮  
橫蒼烟隨武可作兮臧孫有後崇崗樂石兮昭晰悠久  
吁嗟王公斯不朽

唐故鄜州伏陸縣令贈左散騎常侍王府君神

道碑銘

并序

國家以孝理天下褒有功之臣寄崇元侯及先子印綬

各器賁於冥冥繇是王公三受追命有金貂附蟬之飾  
公諱崇術字敬方其先太原晉陽人晉司徒渾之後也  
中以閹閹徙於帝邱今以名數籍于轂下曾王父皇集  
州司倉參軍元素元素生朝散大夫滑州渭南縣令瓌  
生蔚州司法參軍宏効皆用儒行自守故纓轂未華仕  
不過郡掾史縣大夫而休問四暢公卽司倉府君之子  
方嚴密靜忠厚温克覽六籍三畧如古人之心開元中  
舉孝廉仍歲爲有司所絀因罷卷慨息慕班超傅介子  
之爲人遂從河西節度杜尙書暹撫劍相合一命昭武  
校尉蘭州金城縣別將再命鄜州修武府左果毅都尉

伐謀決勝多以咨之居戲下數歲因喟然曰務功伐而  
違敬養豈吾之心耶陟岷倚門慈戀交感及嘉仲由而  
罪吳起去危事以承歡顏旣至郡按察使表其義風可  
移於教化有詔試守鄜州伏陸令爲之三年禮俗休和  
入爲怡聲出有循政熙熙然千室以仁遂焉雖宓不齊  
之理單父庚桑楚之居岷嶠不是過也察廉薦延者方  
因公以俟上賞俄丁太夫人憂喪期斬焉闋而猶毀又  
喟然曰嚮所以不擇祿者備膳羞耳今則求志豈蘄畜  
於樊中耶於是善閉以葆其身教忠以大其門語仁義  
於燕間集寵嘉於後昆以天寶八年春正月考終命于

濮州濮陽縣享年七十二嘉耦北平田氏夏州司馬藝  
之息女淑慎柔正宜于家室後七歲没于徐州有子三  
人長曰奇哲倣儻沉勇與河內尙衡扶義于河南積功  
榮至恒州刺史蹈難以没不害於仁次日棲榮亦以忠  
力策謀至左威衛將軍幼曰棲曜寬明博大有文武畧  
左右征師炳著成功掃蠱毒於姑胥靜鷗誼於夷門興  
元元年以太子詹事加御史大夫繇太原縣侯進封瑯  
琊郡王貞元三年從晉國韓公來朝京師拜輔國大將  
軍左龍武軍將軍明年又以御史大夫爲鄜坊丹延等  
州節度觀察等使十二年就加禮部尙書納忠服勞考



禮修職克稟風訓爲時翰垣旋觀賦政之府乃公筮任  
之地感霜露於怵惕展蒸嘗於吉蠲蓋貽慶考祥必有  
所自不然何回復宏大於是邦耶初大厯十年朝廷以  
尚書偏師策勲贈公開州刺史貞元九年又以撫劍宣  
力贈公宋州刺史是歲天子以一純二精大饗報本其  
明年贈公左散騎常侍夫人始贈北平郡太君再封北  
平郡太夫人至是三加爲燕國夫人十年十月追錫之  
車服器用改葬之祔鞞合祔濮陽縣洛城鄉全義里之  
西原先是尚書旣得吉卜如始居喪之戚累章請乞親  
壤樹上以戎闕委重俾其子正元往襄事焉噫嘻追養

繼志有哀有敬義方啟迪之遠纂服裕蠱之盛蕃衍昌  
阜叢於子姓宜哉斲石舊封以攄德善其銘曰

仕不必貴難乎求備抑抑王公修仁踐義式昭再命宏  
厥武事美化一同炳然文理燕居就養消息恬智從心  
之年亦已過二沒代流慶密章下賁此追劇藩乃進常  
侍婉彼燕國柔嘉樂易光叶闈門克昌後嗣蟬冠象服  
同穴茲地金石繫辭式昭遺懿

唐故通議大夫守戶部尚書兼御史大夫持節

充朔方鎮西北庭興平陳鄭等州行營兵馬  
及河中節度都統處置等使兼管內觀察使

權知絳州刺史賜紫金魚袋贈揚州大都督

府李公神道碑銘 并序

周道親親夾輔王室分唐叔以懷姓九宗職官五正故  
其後文侯受和鬯之命文公受大輅之錫祿勲推恩敦  
叙昌大理道之所繇也國家憲章文武選逮明德元功  
侯籍延耀本枝初太祖景皇帝之支曰鄭王亮實生淮  
安王神通用親賢功德左右休運淄川郡王孝同淮安  
之昭也右衛將軍燧淄川之穆也劍州長史贈太僕少  
卿廣業承祖禰積厚之慶而生尙書尹三王都惣六師  
帥八命四履投難服勞有猷有守以至歿代禮賁於追

命澤流於代官有由然也尚書諱國貞字南華天姿風采爲宗室儀矩列如寒泉疑若崇山修身筮仕動有休裕開元十三年明皇帝肆覲東后柴于岱宗以公族侍祠調補綿州參軍事暴雨忽至江流羨溢公自下位能禦其災旣堅舊防乃復故道累遷岐州錄事參軍太師苗公太尉房公繼爲二千石皆所引重御史大夫張倚採訪關中表爲支使天寶末林胡覆三川犯秦關詔除殿中侍御史爲襄陽郡司馬且介戎政公以侍板輿辭革車換房陵太守表課尤異徵拜長安縣令風政肅清改秦州刺史命或中止復爲長安令尋遷汴州刺史未

及行復輟爲京兆少尹天子以公積有試効可居大官  
累命爲河南京兆成都尹劍南西川節度使其撫周郊  
狹獠方熾公與太尉臨淮王議曰河洛爲天下衝且無  
車賦比屋安堵寇將甘心焉不若虛其邑居挈以駿邁  
贏糧善地可俟師期繇是太尉壁河陽公次于陝伐謀  
消患君子推其智其在京轂兵火之餘人命將沈一作泛  
物力亦屈而百役煩苦出於傷痍公曰元元愁歎受命  
惠養儻不能曠然丕變豈副明天子鬱悼之心耶列上  
蠲除悉蒙可報凡調於人者去其十九清淨愷弟百姓  
稱其仁鎮岷峨裔人樂禍殺嘉榮二州刺史以開邊隙

公命將疾攻舉無遺類明年昆戎圍我三城遣銳師據  
便城壁戒嚴持重徼其極而擊之賈餘無前酣戰盡殪  
悉獻虜獲軍無私焉隣壤不靖偏師叛換將盜兵符已  
據城寺出車壓境指顧而平凡三整武經而巴蜀軌道  
拊循安重四封畏其威柄用者沮公勲猷徵爲殿中監  
命書旣下不俟駕行囊被單車無道里費取倍稱之息  
五萬甫達京師上嘉而賜之俾折其券寇有段子章者  
恣睢就戮方帥以吉語聞詔公宴見前席獎與曰利兵  
積穀皆卿之素也其無駭夸父之謂乎朝野嘉其首公  
而服其絜已臨淮王移鎮海岱長轂在郊西邊北朔合

淮陽圻父五諸侯之旅主盟中權盡護諸將於是拜戶  
部尚書河中節度都統使又以職顯戎重則風俗不阜  
加管內觀察使權知絳州刺史公外摠方畧內修班制  
當強弩之末無半菽之糧不忍加賦飛章未下猶以憲  
度爲已任推剽者斃不行師諸校壽張觖望至是夜暮  
變起或以跳驅諭公公曰吾之不敏當死節官下安敢  
貳偷以煩刑史亂之剡也公竟及焉議者尙其絜矩而  
哀其不淑時上元三年建卯月春秋四十八是歲改元  
寶應至夏五月寧神于三原縣之北原詔以揚州大都  
督印綬告第憫其勞也公本諱若幽上元中天子以特

立之操爲宗公表率錫嘉名以更焉公忠儉誠厚方嚴  
密靜用儒行憲令修明事功大玉不劇楚金必割凡歷  
官二十四自解巾至握節勤職十七其以內庭持書中  
執法亞丞相佩兩印以雄外服者又七命焉刺房陵之  
後五六年間車不輟鞅賦職任功名聲音明及公以司  
徒總輿師令弟若水以內府司贊謁而太夫人福履所  
介也陳壽觴懷黃佩玉左右溫清極魯侯之燕喜邁張  
仲之孝友宜錫壽寵爲人倫龜龍會未中身遭罹凶害  
前史稱霍去病亦有天幸然則命之所賦有幸焉有不  
幸焉斯不可問已夫人扶風郡君竇氏鴻臚丞光之女



揚府長史御史大夫餽之姊也淑明仁順克叶公志家  
肥族睦抑有助焉公薨若干年而夫人歿子四人長曰  
錡材氣碩茂絜廉貞肅遵修訓則復大其門入作卿士  
出爲侯伯貞元十五年以御史中丞剖符潤州宣風以  
宏禮俗成賦以殖財用大績茂焉中邦賴焉明年就加  
御史大夫十八年進禮部尙書撫封題劔如公渥命次  
曰鎰蘄州刺史次曰豐士鄆縣令幼曰豐器長安縣尉  
皆有幹裕而屈於年位今尙書永惟先公丕矩未刻金  
石以德輿嘗叨史職久掌贊書知王族大僚之事業見  
託論譔故不敢默其美亦不敢溢其言銘曰

堯睦九族漢封同姓烈烈淮安乘時佐命淄川而下三  
葉儲慶乃生我公紹續先正時惟崇英忠智廉清所至  
風行所居理平山元朱組旣靖蜀京鉞鉞瑯戈乃主夏  
盟交修藩衛纂服宏大陟恪左右勤勞翼戴隱微之間  
乃與禍會夷途始半白晝中晦桓楹羽葆久閱鮮原煌  
煌密章肅肅絲言盛德復祉叢滋後昆列郡是式介人  
維藩大江南服考禮修職五曹十聯克嗣先德董是經  
費陳之藝極本於教忠懋此宣力伊昔祭器實銘蒸簋  
禮則有變魂遊在茲連崗陂陀宰樹參差悠悠終古永  
揚斯碑

權載之文集卷第十七

唐權德輿字載之

碑銘

唐尚書度支郎中贈尚書左僕射正平節公裴

公神道碑銘

并序

王者奉三無私以勞天下則崇德報功加恩飾終與覆  
載照臨相爲用一也惟正平節公以愷悌文敏爲二千  
石尚書郎人浮於食位不配德纂積厚之緒業貽克家  
之燕翼流光裕蠱爲代師式乃元和五年夏五月  
追命告第爲尚書左僕射孝本乎忠榮生乎哀用攄罔

極以刻金石云公諱倩字容卿河東聞喜人其先嬴秦同姓因封受氏魏晉已還號爲多才八賢方駕百族歸重自魏冀州刺史徽五代至中軍將軍雙虎中軍五代至隨左光祿大夫皇朝贈原州都督忠公仁基忠公生皇銀青光祿大夫禮部尙書定襄金牙兩道節度行軍大惣管贈太尉聞喜憲公行儉公之曾祖也憲公生皇光祿大夫侍中兼吏部尙書宏文館大學士贈太師正平忠獻公光庭公之王父也忠獻公生皇尙書祠部員外郎贈太子賓客稹公之烈考也公天資宏裕虛受通理臧氏之有後於魯管氏之代祀於齊遠至之器發於

岐嶷年十一以相庭推恩授家令寺正滿歲選部銓第  
甲乙補太常寺主簿居先府君喪漿水不入孺慕殆於  
滅性宗門憂其死孝經一作禮文俯就衣服外除厯華陰  
馮翊二郡司戶參軍轉秘書郎俄丁內艱毀瘠如初禮  
違難江介就拜洪州司馬改太子司議郎徵爲殿中丞  
侍御史拜度支駕部二員外遷司勳郎中秘書少監厯  
信饒二州刺史復徵爲度支郎中其佐鍾陵也領留府  
之重居議郎也贊計司之職暨登中臺亞中秘皆兼柱  
下方書之任自淮而南涉江而西荆衡漢沔湘中夏口  
半天下輿壤爲都府者十數公四顛使車連佩數印督

課郡國調其盈虛吏祿兵食之仰給輸將轉漕之回遠  
法錢牢盆之制田租口賦之差權其輕重商其功利察  
下人之疾苦廉長吏之善否車不輟鞅有勞於時其始  
受命也寇劇橫厲三川如燬陰方出師慕義助順代宗  
焦勞念慮命德宗以雍州總戎賦輿所會征繕不給有  
詔輟東方軍市之租移用于中都屬受鉞之臣矜功缺  
望師老專利便方自營公慨然牒書譏切備至向之廢  
格悉用平鑄義夫以之感激王族以之震耀其理信州  
也用寬惠誠厚輯柔所部稽事滿野嘉生同穎年以順  
成人斯洽和復其庸亡五千室闢其農耕二萬畝交代

之日不書於籍且曰吾以恤隱豈當沽美不伐之善欲  
蓋而彰方帥表理行第一增秩至正議大夫加金印紫  
綬其爲饒州屬所代者非其人因緣權幸貪猾無  
狀公以廉平頒詔條以慘怛撫痍傷四封愛戴如熱斯  
濯其後徵拜也朝廷誅內臣修百度彌綸經費委重有  
司公以郎吏代故相第五琦專判度支事方冀裁成九  
賦超贊六職以美利利斯人人望日大天胡不惠以大  
厯七年秋七月考終命于長安光德里第春秋若干以  
某年月日歸全于萬年縣神禾原之大墓禮官博士以  
公處難不謀其身牧人不私其功能固所守以行制度

易嘉名以旌行禮也惟公直而溫簡而文才裕於物器  
周於用靜若著龜動如干鎔秉是貞厲終焉節適著文  
集十卷澹城集五卷比興屬和聲律鏗然引拔參佐皆  
一時名士風采賢材邁絕羣倫齒位未極爲薦紳所痛  
夫人京兆韋氏扶風太守恒之女以太宗之冢婦諸侯  
之內子衿鞶承訓籩豆助祭當室以敬睦親以仁姿操  
卓淑音徽宏大盛德著乎母儀惠心通於佛乘五蘊不  
入六姻是憲始封咸寧郡君後三追錫至邠國太夫人  
有子曰均以御史大夫工部尙書尹正荆門節制上游  
就加吏部尙書尙書右僕射元和三年抗章入覲真拜



右僕射判度支加秩金紫光祿大夫由河東郡公進封  
郇國歲中進左僕射同中書門下平章事撫征漢南臨  
長諸侯惟郇公直清宏重有文武貞幹得時大行爲王  
室輔慮善以動官修其方賦政以惠南國宣威以靖西  
蜀師長百工阜成中邦兵符相印焜耀章灼樹善程能  
之績勤身體遠之用居則有猷動則有功率循風訓以  
履尊大君子曰憲公忠獻公之休烈丕矩再世盛德屈  
於郎位必復之慶其在是乎初郇公之受律也孝文追  
贈公絳州刺史其進律也順宗贈公禮部尙書今皇帝  
永懷義方於是有左揆之命公之績慶郇公之孝思可

謂至矣。郇公以三代論議皆上台雄文，猥以通舊忘其卑鄙，辭則不腆，庶傳信之無愧焉。銘曰：

河汾之東，慶祉所鍾。公相葳蕤，德輝昭融。矯矯節公，體仁循性。乃貽後昆，實稟先正。大尉經武，大師翼聖。施于儲賓，執德之柄。公用循良，惠于三邦。公有德澤，宣于四方。急病尚仁，履險乘剛。化被煩苦，斯焉樂康。吉祿方摯，壽堂以閔。藹此家聲，揚于令嗣。恩崇鼎鉉，績茂師帥。中外服勞，安危注意。便蕃屬任，宏大名器。孝理是尊，義方所自。九原之中，禮盛服充。王三錫命，綈飾宗工。連崗崢嶸，介原穹崇。陵谷有變，令聲無窮。

唐中散大夫殿中侍御史潤州司馬贈吏部尙

書沛國公武公神道碑銘

并序

種德考祥賢人積厚之業尊仁安義君子揚名之孝其  
敬養也諭之於道其貽慶也教之以忠宏保乂於元臣  
集寵靈於追命見之於尙書武公矣公諱就字廣成沛  
國人周室之興本於忠厚趙王之裔厥有勲賢元魏步  
兵尙書鴈門朔方雲中馬邑四郡太守始啟封晉陽田  
祿蓋大生國子祭酒受陽公神龜受陽四葉至太原王  
諱華太原生鄼國節公諱士逸節公生河間郡王諱仁  
範河間生潁川武烈王諱載德代以文武上才爲將軍

二千石識芒碭之氣密贊皇圖承沙麓之祥分封戚里  
潁川生考功員外郎修文殿學士諱甄字平一以字行  
於時未弱冠有重名閱覽博古爲人文龜玉在天后朝  
累徵不起以公族好爵爲懼常晦其明與桑門大士修  
無生法中宗復辟用踐周行載筆論思特盛淵雲之選  
賦詩感激必以呂霍爲誠雖位有陟降而道無磷緇叢  
滋後昆纂服遺烈公卽考功府君第三子也肅而寬簡  
而廉忠方抗直純厚彊固博洽文誼周通憲法始以方  
聞之士對詔策佐宮衛李梁公峴之守右扶風也表爲  
兵曹掾宣皇在岐供侍有勞改永樂令厯河中府戶曹

轂下求吏轉萬年丞建陵復土推擇充奉拜醴泉令朝  
廷嘉其才擢爲殿中侍御史修起矩度堅明不回時戎  
車方駕泉貨力屈皇華載馳董荆衡漢沔之賦以嚴見  
憚爲吏議所侵貶郴縣尉移句容丞二地有南嶽三茅  
靈僊遺趾於是浩然自得與道爲徒方解纓絡以暢天  
理且曰窮與通在吾靈龜耳外物其如予何其道觀察  
使挹其風聲薦授秘書郎潤州團練副使入爲京兆法  
曹加中散大夫忽忽不樂求爲潤州司馬滿歲徙家嵩  
洛愈尙夷曠中朝名卿大夫四方賢侯通人多與公爲  
道義之交賈太傅魏公用清靜理東郡以蓋公待公亦

既戾止俄然化往時貞元六年冬十一月享年八十理  
命終止視道門儀法以明月之晦降體魄于邙山北原  
有靈鶴百數徊翔嘹唳其休徵歟其元契歟惟公文學  
政事泣官十二次冠神羊駕四牡剛腸正詞臨事風生  
君子之方有迂有合或忌公之直或愛公之才行藏牽  
乎時而道不屈得喪宜乎已而神益王與張禮部謂元  
容州結歌詩唱和著文集五卷自有塗中之適異乎澤  
畔之詞前夫人隴西李氏生長子譚而歿譚爲金壇令  
士行清修官屈其志繼夫人汝南縣君周氏中書舍人  
思鈞之孫單父令瑛之女專柔淑慎以正家道有子曰

元衡文行宏懿靜深周密遵道而行有儀可象代天工  
以和帝載賦明命以贊皇極元和二年春正月由戶部  
侍郎同中書門下平章事秋八月兼領戶部侍郎事冬  
十月又以門下侍郎檢校吏部尚書成都尹劔南西川  
節度觀察西川八國瀘南安撫等使自文水縣男再徙  
封至臨淮郡公上以井絡之下新去湯火亦旣震耀是  
圖生殖輟台宰之重爲慈惠之師黃樞金鉉鉞鉞鉅鬯  
旬歲間三錫命烜赫嘉會綢繆樞極信向禮賜冠于羣  
倫豈非公之道阨而不伸而昌大於後抑義方家法固  
有類乎公捐館四年而夫人歿其明年臨淮公乃舉公

之窆與夫人之喪改葬緱氏潁川王之兆從先封以叙  
昭穆禮也初臨淮王至監察御史而孤其後再爲中執  
法朝典覃恩贈公杭州刺史其司大政也再贈公吏部  
尙書夫人始追封文水縣太君益封汝陰郡夫人顧復  
罔極之報哀榮歸厚之禮成於德器名教稱之臨淮公  
考功府君之謫掾于吳也與德輿王考府君有僑札之  
契油素斯在清徽未泯德輿獲與相君交代爲地官小  
司徒陪外廷之末議承宰府之寬政有命論譔忘其菲  
薄刻茲樂石以表鮮原銘曰  
君子之道剛方絜矩或消或長或默或語於惟尙書執



憲天朝密侍殿內肅清羣寮鋒芒肯綮湖海飄飄以恬  
養智毋落吾事涓合虛元脫遺聲利題劍告第寵靈斯  
備元袞介圭流光所自煌煌台宰天下是毗廕庥岷峨  
灑濯癘疵顧此忠力無非孝思緱原峻厚兮幽宅悠久  
崔巍介石兮天矯螭首鏤嘉聞兮示厥後

唐故光祿大夫檢校尚書右僕射兼右衛將軍

南充郡王贈太子少保伊公神道碑銘

并序

昔伊尹相湯伊陟相太戊咸有一德格于上帝其後伊  
籍以敏辯仕蜀爲將軍伊馥以勇力佐魏爲司空曠遼  
綿代復纘休緒者曰南充郡王諱慎字寡悔剛毅勇悍

鷹揚鸚立勞勤四朝終始一心涉覽春秋戰國策太史  
天官五行之書用善射中鵠補廣州綏南府折衝都尉  
丁夫人憂以毀瘠聞初公之孤也幼不知先子之殯將  
祔二尊日號于天魂交神選盼蠻誠感壤而樹之率禮  
無違大厯中嶺南裨將哥舒晃盜殺其帥呂嵩賁以亂  
竊據府中南方蕭然江西連帥路嗣恭承詔出師命將  
孟瑤暨公以討公以水陸士徒分道鼓行晃之謀主蘇  
渙騎將王明悅鴟張蟻聚皆據阨害公曰寇不可翫勝  
無幸焉毒之酒腊盡在是矣疾力交梓必啜吾中  
乃舂其喉而潰其腹斬首三千級下韶州其明年戰于

把江口水道湍悍戈船赳赳公浮筏寘薪迎風縱焰寇  
之燋没于水火者終夕有聲又明年軍于滑口于端州  
于潮陽次于廣州冬十月斬晃渙于泔溪揭其首以徇  
幕府上功拜連州長史換撫虔江三州別駕建中初德  
宗訓齊万方端正百度以梁崇義負阻江漢未嘗會朝  
詔東諸侯分道問罪公實領江西偏師而統于希烈希  
烈以牒書署公漢南漢北兵馬使公明智牢讓獨率所  
部兵大破翟暉於蠻水俘徒三萬以至于斬崇義平江  
漢厥功居多希烈愛公愈深公懼之愈切一旦夾與數  
騎遁歸旣而希烈以急變聞且賂公以堅甲善馬爲之

反間密詔嗣曹王卽訊因俾論公如法公方握兵符在  
境上微聞有命歛手就召曹王挹公名義偉公姿材取  
酒爲壽交歡感泣手疏上列辯其寃誣委之先偏激以  
自效乃畧黃梅次長平遇劇賊韓霜露引滿中股斃於  
萬衆之前其徒相蹂蹈死者十七八拔蔡州取蘄州降  
山寇李良領蘄州刺史剖符爲王加御史中丞興元巡  
狩之歲使臣底貢次于蘄口時希烈已屠陷大梁遣其  
腹心杜少誠引勁兵絕江流公以行師七千列樹三柵  
破之於黃崗少誠遁走斬驍一作將許少華封其尸爲  
萬人冢進圍安州希烈遣其甥劉介靈二唐書作虛來援擊

于應山生得介靈與郭嵩李廷玉降七千人收戶一萬  
四千人夫婦男女耕桑安堵乃督安州加御史大夫真  
食百室二年五月引兵攻隨走康叔夜於厲鄉獲馬牛  
輜重以益軍實表僞署刺史李惠登爲之刺史終以理  
行聞十二年用久次就加右散騎常侍後三歲天子以  
公積功勞使中貴人持命書金印卽本郡授公節度觀  
察使且裂齊安爲支郡尋詔公兼統荆洪潭三道支兵  
討叛於蔡敗之於三州港營于義陽戰于申斬級千數  
有詔班師就加刑部尙書進右僕射今天子嗣位拜章  
入覲真授右僕射俄檢校左僕射兼右金吾衛大將軍

坐細故退爲右衛將軍明年復檢校右僕射兼右衛上將軍元和六年十二月晦寢疾薨于光福里不及懸車者二歲追錫太子太保同盟諸侯皆使其命介來弔祠視喪事明年夏五月庚申葬于萬年縣某原鹵簿騎吹如葬禮初公之曾王父皇太子通事舍人澄生左衛長史悅悅生贈太子太保衡公之祖禰也積善餘裕追崇以大惟公以武毅通文理硯席楷隸心師自得感槩出倫談事如雲起南方禪校屢陷軍陣勢若猛鷲不辭劇易急病而益裕其才履危而不昧於邪悃愾忠直爲中興名將以至於授英蕩題龍泉有功烈勲勞於天下脫

劔薦紳從容漢廷徼循師長文武三品啟體歸全追榮  
宮師豈徒然哉公之息男十六人其冢嗣曰宥左領軍  
衛將軍押右神策軍牙門之職能率義訓以揚家聲初  
公來朝也詔宥以待御史領安州刺史由二千石入筦  
南北軍教忠移孝情禮盡在宥以鄙夫與太保同居里  
閭且以理命遺緘辱徵斯文表諸神道不敢誣也銘曰  
在殷保衡負鼎而相惟唐南充推轂爲將泔溪之刑嶺  
表乃平蠻水之捷漢南以清蔡寬滔天曹邸鼓行公率  
武旅迅如風霆蘄春安陸連下劇地專城建牙宏大名  
器交修威懷較著功利介圭會朝脫躡師帥南宮端右

武侯緹綺沐浴休明保完富貴歲降婁兮月大呂一氣  
散兮無處所繫甲車兮馬鬣封九原夕兮閔音容揭此  
介石厥聲無窮

唐故江南西道都團練觀察處置等使中散大

夫使持節都督洪州諸軍事守洪州刺史兼  
御史中丞騎都尉賜紫金魚袋贈左散騎常

侍崔公神道碑銘

并序

博陵崔公諱某字某仕至御史中丞洪州刺史江西都  
團練觀察使元和七年冬十一月某甲子啟手足於郡  
舍享年五十五皇帝不視朝褫以左散騎常侍印綬命



郎吏吊祠明年十一月耐窆于東都河清縣先正之大  
墓又明年其孤仲謨纂其代德家法命書愍冊請刻石  
繫辭且自本日炎帝之後秦夏里黃公廓漢東萊侯伯  
基東漢長岑長駟濟北相瑗晉左僕射洪之代也洪七  
葉至北齊禮部尙書文恭公聖念聖念四葉至君曾祖  
知晦應銷聲舉授兗州金卿丞王父瑜朝議大夫忠王  
府諮議贈太子賓客烈考灌再爲澧州潭州刺史以御  
史中丞領湖南觀察使當宣武之際用愷悌修政爲代  
吏賜優詔錫今爵推理行第一神道繆鑿遭罹戕害他  
日以君之勤贈太子少師君慈和修潔平粹文敏以勤

身之功善揚積厚之風類始以門廕調河中府叅軍歷  
邑丞廷史從事察視凡南臺外三爲殿中侍御史嘗以  
公事貶台州司馬聯帥表於理下旋以上介入拜侍御  
史遷考功員外郎度支吏部二郎中商常二州刺史以  
至按部撫封爲太子守臣所居可紀漸漬光大其爲郎  
中考課經費彌綸綜覈三劇曹無留事瀕江郡國仍歲  
天癘而澗河之東南旱特甚縣官恤然臨遣使臣發吳  
之公聚賑越之糶食君受命載馳仁聲先翔噢咻憐怛  
布施優裕不樂宴私不嘗酒肴東人鼓舞感動肝膈其  
爲常州漕引河渠通申夏二濇以宣利澤郡有聽斷之

下有如神明及處方任爲仁由已凡封逋負數千萬夫  
家病焉君曰不曠然大貸無以休息悉用條上盡蒙可  
報然後均列城之田賦去都府之煩弊吏措手足事無  
尤違仁矣哉詩稱仲山甫柔嘉維則申伯柔惠且直惟  
君亦柔而立溫良而能斷教順導利外寬內明函達于  
雅故勤施于政事稽洪範三德其甫申之柔乎凡厯柱  
下史東曹郎皆居代官列郡二千石方帥執法皆循風  
訓江湖之間壤地相錯蒙君父子仍代之澤豈天意之  
裕斯人耶鄙夫久貳六官與君周旋甚熟頃忝宰府詳  
知報政迨茲君守而仲暮儼然焉衰疾不文直詞傳信

銘曰

矯矯少師涖湖之南播遺懿兮抑抑常侍在江之西施  
美利兮乃代元侯寬明輯柔政樂易兮此物此志四封  
茂遂古循吏兮宜永介福奄然厥復左貂襜兮河清鮮  
原羽葆翻翻潛智氣兮有涯必盡流此淑聞斯可貴兮  
刻飾豐碑崔嵬龜螭永爲識兮

唐故尚書工部員外郎贈禮部尚書王公神道

碑銘

并序

今皇帝始初清明永貞紀號追命故工部員外郎王公  
爲華州刺史改元元和之明年再命爲禮部尚書裕蠶

之風訓漏泉之慶澤父所以教忠於子臣所以移孝於君人道之極盡於是矣公諱端字某太原人曾祖景肅皇澧州刺史祖威德州司馬父思獻襄州襄陽縣令公方嚴有志尙沉粹潔清不流於俗舉進士宏詞連中甲科授崇文館校書郎累遷監察御史工部員外郎其於奉朝請之外或介隴坻或留洛邑以疾乞告遇安祿山反書聞南游江湖自適其適乾元己亥奄至大病噉夫自開元天寶間萬戶砥平仕進者以文講業無他蹊隧薦紳之倫望三臺如登青天公與河南元德秀天水閻伯璵同歲中正鵠其後冠惠文趨建禮憲章奏議與名

聲俱當時士君子猶以未充量爲嘆其文峻清不滑於  
波流者還一齊記惠上人碣銘微妙虛空深入無際嘗  
與故太師顏魯公暨柳郎中芳陸員外據殷永寧寅爲  
莫逆之交陸嘗言王之莊柳之辯殷之介皆希代鴻實  
知言者以爲實錄有子三人長曰綽入道精修爲桑門  
上士次日紆以文行篤實厯右補闕起居郎右司員外  
郎庫部郎中又次日紹本名犯皇帝諱而更焉忠厚宏  
裕爲德宗所器厯任戶部侍郎戶部兵部二尙書咨俞  
關決過於宰府大政密議須其一言持平以有守樹善  
而不伐天下之人謂之長者睿聖繼明以檢校吏部尙

書爲東都留守東都畿內防禦使以檢校右僕射爲徐州刺史武寧軍節度使元和七年入覲復爲兵部尙書俄拜戶部事四征六職喧赫尊大故公再有追錫之命夫人亦累贈隴西郡太夫人龍泉魚軒賁飾于冥冥之下名教德器有哀有榮孝理之感人深矣初公之捐館也行次信州瘞於玉山前此夫人歿于洛師窆于潁陽僕射竭其誠信日月有時矣不幸薨落理命其三子嗣事焉由是僕射之孫曰門下省典儀元泰試大理評事攝監察御史元質右威衛倉曹參軍元弼等窮毒在疚護王父母之輅車間關跋履泣問著蔡以八月某甲子

木直之集 卷一  
三  
耐于萬年縣鳳棲原克纂先志禮無違者而又哀請父  
黨篆茲祖德永揭神道用愧蕪辭銘曰

懿懿王君黃中有文清時發身舒翼卿雲執憲平明含  
香馥粉慶靈下鍾復大其門追錫儀曹徽章顯尊鳳棲  
古原龜策不諼泣耐雙魂禮成孝孫刻銘斯碑君子之  
墳

權載之文集卷第十七



權載之文集卷第十八

唐權德輿字載之

碑銘

唐故朝議郎使持節温州諸軍事守温州刺史

充靜海軍使賜緋魚袋河東裴府君神道碑

銘并序

春秋時賢卿大夫皆叙其代功舊德章明以績一作續蓋

黃流玉瓚之寶產於深山清廟夏屋之材秀於中林其

或為珩為佩為節為稅無非禮神用修崇構洪河之東

裴氏在焉自魏晉迄今忠賢輩出土林以為領袖史臣

疲于簡策而又奕代降休且公且侯上嬪王姬出領方

州者可得而言以刻金石曰君諱某一作希先字某四代祖

懷節皇給事中工部侍郎荆揚二大都督府長史洛州

刺史謚曰定曾祖昭厯司門度支二郎中衛尉太府二

寺卿祖確厯左右衛左右金吾衛四大將軍太府卿太

子詹事平陽郡開國公謚曰貞自定公至貞公皆銀青

光祿大夫以至烈考怍仕至麟一作鄜州刺史太子僕贈

絳州刺史凡四代貴仕左曹二千石四衛九列副冬官

尹東朝禮及易名恩深追遠代修其業鍾美於君君寬

裕博厚恭儉莊誠資性端直詞氣閑雅於經書泛為疏

達而不窮章句於吏道通於理術而不求聞問自解巾  
至於捐館凡歷十一官無秕政無違德祇守家法奉以  
周旋仕於宮朝始爲僕寺進爲洗馬中允再爲家令仕  
於王國歷濟陳蜀三府初爲騎曹掾次爲長史次爲傅  
其初又爲壽安丞後牧臨邛乃遷永嘉班宣六條撫柔  
二郡惠和所被夷越嚮方其在朝也以晁錯之智王陽  
之道而滯於散地恬於久次其剖符也仁恕愛禮而不  
苟簡奉法循理亦不細苛居三年以疾受代貞元六年  
冬十一月没于鍾陵之私第享年若干明年八月返葬  
于長安少陵原之舊塋以夫人永年郡主祔焉禮也惟

郡主元宗之孫今皇帝之從祖姑也儲是慶靈生而洵  
淑窈窕德象婉婉聽從備柔嘉之行成肅雍之道初天  
寶十三年詔選資地才令以府君有安仁武子之美而  
下嫁焉齋莊以主中饋和樂以宜姻族作配君子禮同  
家人嚴祭祀服澣濯者三十六年而歿春秋五十八歲  
貞元五年也鍾陵之守臣以聞上不視朝卒禮有加嗚  
呼以公之率履永年之仁淑宜其蕃祉老壽子孫繩繩  
而生不極其道歿無主其後此伯道之痛碩人之詩所  
由作也遺命以兄之子某爲嗣乃列其祖代官伐請刻  
豐碑辭之不獲乃繫辭曰

河東右族蕃衍紹續代功世祿昌而熾兮乃生永嘉剖  
符承家實而不華諭於義兮二邦靜謐禮之善物朱幡  
赤芾亦爲貴兮有齋永年作儷仁賢佩玉鏘然四德備  
兮天漢之尊平王之孫爛其盈門恭祀事兮返彼元壤  
少陵之上終古悽愴金石識兮

唐故成德軍節度營田副使正議大夫趙州別

駕贈壽州都督河間尹府君神道碑銘

并序

詩之小雅曰尹氏太師秉國之均大雅曰王命尹氏戒  
我師旅然則代爲天子三公大夫參掌文武故吉甫有  
作憲之美翁歸爲兼備之才周漢以還似續忠厚今義

武軍節度使相國延德郡王司徒公之從事曰澄從公  
來朝朝有賞典式寵戎輅當簪法冠永懷罔極之恩願  
迴追錫之命司徒嘉焉以其詞列上先皇帝孝理天下  
愀然曰俞繇是輟功次之遷遂飾終之澤迺三月丁酉  
有詔贈澄之先人正議大夫趙州別駕鈇爲壽州都督  
先夫人吳郡陸氏爲吳郡太夫人印綬璜珩光耀幽窆  
哀榮所被名教多之澄又稽甲令釋家謀以漏泉告第  
之恩有螭首龜趺之制於是傳詩而系辭云都督以諱  
爲字天姿剛健經術百氏陰符六韜皆所講習通其旨  
與天寶初舉進士不第幕府上功盧龍府別將稍遷瀛

州高陽縣令歷恒州司法參軍橐城令寶應初以太子  
中允兼恒州長史錫金印紫綬廣德中遷易趙二州別  
駕節將推其才表爲營田副使理二縣佐三郡勞徠安  
集周爰圖慮以饑饉之歲丁師旅之殷敷其慈和得以  
安靜議者以魯仲堪龐士元方之旣董大田實居上介  
俗知禮節師以阜饒方陟勞課奄然大病以大厯七年  
秋七月啟手足于恒州靈符里享年六十一以明年夏  
五月窆于藁城縣東子樂原夫人嵐州刺史道之孫密  
雲令昌嗣之女能以仁順洽于宗姻晝哭旣除喪十四  
歲以貞元四年冬十月歿于道州以十一年冬十二月

耐焉從魯禮也有子三人長曰渾唐縣尉次曰濤趙州  
司功參軍皆不幸短命澄卽其幼子也尙學理文敏信  
誠厚雅有恂悞不隨波流山東士大夫多稱其名義由  
北平尉爲定州功曹掾辟司徒府主其謀猷每懷戎章  
驅疾傳陳賦輿之事明利害之鄉叶于中權皆有功效  
洎元侯入覲天子錄功賓僚傳校命賜優重而澄永懷  
霜露願賁邱封感于宸衷盛此徽數君子曰是舉也有  
以見尹氏之孝思都督之流慶上公之與善元首之加  
恩以風四方以厚士教雖澄之未貴仕其所以宏助者  
多矣初都督之禰曰本古仕至常州武進尉武進之父



曰正義歷許相宋三州刺史司農少卿司農之父曰良  
終滄州司馬司馬之父曰文哲仕隋青泗曹濮陝宋洛  
相等州刺史本郡太守大理卿戶部尚書皆有德善揚  
于官業蓋二雅遺烈之所從來遠矣德輿門人蘭陵蕭  
籍與澄爲寮同在公府狀其往行兼列命書忝貳邦教  
敢忘聳善乃爲銘曰

尹氏代律聿修文武自周綿漢炳耀圭組懿懿都督遠  
承丕矩方騁夷途俄歸野土慶延嗣續職佐藩垣遠從  
上台來翊天門追飾二尊輝榮九原密印畫綬隼旗魚  
軒官纔掾吏跡重知己恩迴大君澤及先子以盡忠養

以宏孝理揭立貞珉芳馨在此

唐故右神策護軍中尉右街功德使開府儀同

三司守右武衛大將軍知內侍省事上柱國

樂安縣開國公內侍省少監致仕贈揚州大

都督府孫公神道碑銘

并序

元和元年冬十月內省少監致仕孫公寢疾薨于京師  
廣化里私第享年若干十有一月有詔追贈揚州大都  
督法賻布絹各以百數明年十一月葬于涇陽縣之某  
原命婦諸孤家老故吏以服勞詔祿恩華慶賞之不可  
以不識也請鏤豐碑揭于鮮原云唯聖唐仁澤汪濊威

靈燁耀乃法辰象以嚴武師惟肅宗創新軍于北落克  
靖患難惟德宗置中護于內朝而爲總制翊震嚴以宣  
七德正師律以張四維勤勞警巡柬拔忠厚不失於正  
克保其終者惟公有焉公諱榮義字某其先吳郡人也  
軒裳延耀本冠邦鄉版籍推遷□來京轂今爲京兆涇  
陽人曾祖翼皇右金吾衛中候祖庭玉贈兗州刺史父  
知吉皇開府儀同三司行右領軍衛大將軍知內侍省  
事上柱國魏國公或徼循筮仕道在安卑或麾節加恩  
義彰追遠以至于先公貴位名重前朝宏內省之事任  
受父封之徽命承休襲慶終踐代官裕壘教忠備遵家

法公端良謹重潔白詳明事無尤違心必誠信至德中  
策勲至上柱國起家掖庭局監轉掖庭局丞宮闈局令  
再爲內謁者局叙品至朝議大夫恩錫章服又加中散  
大夫貞元十七年充右神策軍護軍中尉判官纔浹辰  
遷內常侍充副使越翌日兼右衛功德副使十九年拜  
右驍衛將軍充右神策軍護軍中尉右街功德使明年  
有詔知內侍省事歲中加特進右武衛大將軍封樂安  
縣開國男德宗弃天下順宗諒闇整訓爪牙勤宣翼戴  
進驃騎大將軍益封樂安縣公食邑一千五百戶今皇  
帝踐祚以年疾加侵固辭戎政重違誠懇恩禮舊勞拜

開府儀同三司既積沉恙累章誠乞乃下優詔遂其致  
政之請焉初公以大厯中奉使交廣裔夷嗇禍有梁氏  
尋氏聚爲寇數公與守臣決策潛師盡殲南服以清厥  
猷茂焉建中中將軍許庭遊將命北蕃公爲之介屬張  
光晟虎斃其衆與陰方爲仇野心煩言將逞憾以報才  
全智免終靡盬而歸俄而希烈干紀淮瀆不靖受中省  
合兵符取桂嶺湘川之衆益漢陽夏口之鎮以當劇賊  
且護成師收應山援安陸凡鄂之成績公有助焉尋又  
監慶州行營兵馬皆奮策畫用寧邊鄙暨大拊循爪士  
叅贊禁營乃昇副車超踐中尉講軍志循武經比詩人

圻父之職得易象貞師之義承睿謀以決勝援羣師以  
懋功肅肅然安人而禁暴雄雄然由中以制外積勞不  
伐受寵若驚恩波深而守以慎懼爵祿厚而不盟侈汰  
其或方國問遣歲時交煥公曰有齒以焚古人所誠無  
脛而至廉士不居外不異於人中不易其操泛然虛受  
悉助軍實強力匪懈推誠在公或籍在行間而法干吏  
理苟簡書所至必械繫送之心無私焉直而後已當親  
重之任護腹心之臣入近天子之光出列諸侯之上豈  
徒然哉先魏公信嚮釋氏薰修心法嘗於邑里奏建寶  
應衆善寺五代之壤樹依焉至公又請於寺內置無垢

淨光法華三院塔額檀施城獲爲淨人者十輩所以修  
先志所以崇佛乘孝子信士斯爲至矣昔漢室以灌嬰  
爲謁者隨何爲護軍正伯參珥貂之制環列據銜珠之  
重驃騎儀同品皆第一護封益食事軼常均及屏去燻  
灼脩然恬曠家居得謝以至沒身其動也本兵柄而不  
可犯其靜也冥道樞而無所累納忠循理議者嘉之前  
夫人郭氏驃騎大將軍贈開府儀同三司全羽之女克  
恭婦道不幸先歿今夫人東平郡君呂氏柔嘉有儀晝  
哭遵禮奉終誠信以前夫人祔焉長子某次子某官某  
等棘心雪泣銜恤無怙趨承軒禁嗣續忠勞公之兄前

保壽寺上座內供奉監義大德道系捨筏之宗已超學  
地在原之痛猶切孔懷公之弟某官某等同氣聯華致  
美有裕忍哀襄事先遠是圖龜兆告猷芻靈啟路卜佳  
城於此室體魄焉依轉樂石於他山聲塵斯在銘曰

大君御極修理百職抑抑樂安逢時竭力超侍軒墀抱  
公絕私乃將命令以會師期保合誠信周旋險易韜鈴  
講貫印紱歲蕤帝座之西星文昭晰鉤陳之北武旅森  
列爲之總制所以闕決凡在拊循士皆感悅委重三朝  
成功九霄退身崇讓息偃迢迢逝川閤水截道驚鷗恩  
崇幢蓋吹咽笳簫涇流湯湯谷水池陽舊邱崇崗若斧



若堂宰樹如雲仁祠在旁刻銘于茲兮永永不忘

唐故義武軍節度度支營田易定等州觀察處  
置等使檢校司空同中書門下平章事贈太  
傅上谷郡王張公夫人鄧國夫人谷氏神道

碑銘

并序

皇帝以文明御方夏以德禮序人倫貞元十一年秋九  
月詔侍臣德輿以故義武節度檢校司空同中書門下  
平章事贈太傅上谷郡王張孝忠夫人谷氏之淑行內  
則俾刻金石臣聞風有采蘋采蘩易日中饋貞吉所以  
表柔明於內子昭節信於元侯宣力獻功抑有其助夫

人之先魏郡昌樂縣人也。在漢元成之代，衛司馬吉以  
勲勞致命於絕域，大司農永以文學盡規於本朝。前史  
書之以勵臣節。四代祖邪律，皇朝諫議大夫。宏文館學  
士，正直之道播於清時。曾祖輔，哀左羽林軍長史。祖倚  
相秘書省正字，仍代藏器。晦而不輝，考崇義。天寶末有  
行師北鄙之勞，累書勲伐。至左金吾衛大將軍兼殿中  
監，贈特進夫人。卽特進府君之第八女也。稟是明封，鍾  
于女士淑閑之度。中外宜之初，太傅始自軍校建功。河  
朔克彰婦順，敬贊宗事。正位于內，尚柔有儀。洎太傅自  
易部領常山，遂分節旄。以至相公上畧，兼資於明智。中

壺載揚其惠和二姓有輝六姻是憲盡禴翟之飾動珩  
璜之聲建中元年封魏郡夫人三年進封鄧國夫人旌  
淑哲也鵲巢之均一家人之悔厲簋豆敬齋之色琴瑟  
靜好之儀夫人備有焉帷堂晝哭良弓繼志上慈下厚  
就養無方此又令嗣之能致其敬也貞元十一年冬以  
門承勲績之崇恩有選尚之貴方築外館聿來上京十  
二年二月丁卯以疾終于萬年縣安仁里私第享年四  
十九遺章上陳敬而得禮皇情憫惻恩賻有加嗣子茂  
昭義武軍節度易定等州觀察處置等使起復左金吾  
衛上將軍檢校工部尚書定州刺史兼御史大夫延德

郡王博陵上谷之師以續休緒戎車委重優詔抑情次  
曰茂宏雅王府司馬茂宣舒王府長史嗣雍祀王府諮  
議參軍嗣慶試將作少監御史中丞幼曰茂宗銀青光  
祿大夫行光祿少卿員外置同正員駙馬都尉皆以純  
孝裕蠱居喪執禮以其年冬十月甲戌奉夫人之轎車  
葬于京師少陵原不耐舊封式遵古道恩延戚里有命  
從之初夫人之兄從政實傳戎韜之訓以中執法剖符  
定州有姊四人所天皆貴異姓之社從夫以尊公宮之  
教率性而中象服交映魚軒並馳其後婚親無非勲德  
故太尉中書令西平王今大尉中書令瑯琊王皆夫人

之姻也納徵佐餽焜燿一時此又閨門之盛而積善有類也柔正之風本於王化愷悌之澤洽于幽泉此臣所以拜受德音銘諸樂石銘曰

在漢子雲侃然中正昌言獻可遠緒傳慶降及特進策勳斯盛乃生夫人如玉之溫婉彼淑質宜于盛門金鉉石窳所從益尊亦旣晝哭道彰訓育中權之貴克繼藩服下嫁之榮方承湯沐生也有涯壽胡不遐奄然冥漠喪此柔嘉遽返黃壤空悲白華秦原隱嶙丹旒徐引此焉幽宅自昔同盡追琢徽音終古不泯

唐故太清宮三洞法師吳先生碑銘 并序

雲出於山遊於天復歸於自然先生之道似焉涵泳乎  
道之樞倘佯乎物之初以生爲蘧廬復返有而入無先  
生諱善經縉雲仙都山人也自會王父而下皆質誠孝  
敬登聞於鄉黨先生未成童博貫儒書讀道德經至爲  
學日益爲道日損三復恍然曰吾知之矣改習四真靈  
寶等經年十七本郡以制度居縉雲山其後遍登匡廬  
天台三茅句曲泛然不囿於物虛已以遊代乘彼白雲  
至于帝鄉時宰王黃門將爲太清宮使奏隸宮籍乃從  
冲虛申先生受三洞經法貞元中於宮院立仙壇躬上  
士勤道之誠宏大君受釐之重陰功幽贊何可勝言德

宗錫以纂節幡珮靡有不備初冲虛之師曰清簡泉君  
泉君之師曰來君來君之師曰萬君皆有遺像在開元  
觀先生乃茲焉宴息立申泉二碑以發天光以極師道  
凡儒元宿學有道仁人貴遊象服男夫女士傳三景真  
籙者五百餘人一旦謂入室弟子曰天行物化吾之晦  
明其動也與物皆春其靜也與化爲一成形待盡吾何  
爲哉乃於畢原近郊修露仙隱景之地元和甲午冬季  
朔旦齋沐潔清與其徒元言終日越三日焚香朝拜泊  
然返真明年正月寧極於露仙館某年八十三矣其受  
道也有反風晏温之景其委化也有清香靈鶴之祥斯

又不可涯已嘗以爲無心者與物冥則未嘗有對於天下順性命而遺耳目其在是乎其餘奔走於蹇淺倒置之中吾不爲也所注道德經并著文二十篇元覽至頤通乎微妙嗟乎先生之容不可得而見矣先生之言不可得而聞矣但糟粕具在神明不滅采真者得以虛心道門威儀趙常盈偏得先生之學與符洞幽周元德吳元壽董太珣等或關尹受教或庚桑爲役有年數矣吳郡歸冲之廣平劉素芝天水權載之皆從先生遊者也元德狀其崖畧授載之以金石刻噫嘻老龍吉死矣安所發予之狂言哉乃銘曰



萬情弊弊謬繳之內先生懸解遐視區外族系于東吳  
稟靈于仙都演道于明廷棲神于太清隱機于開元歸  
根于露仙其來適然其去寥然大圓清兮大方厚元鄉  
返駕兮無何有刻介石兮茲不朽

唐故章敬寺百巖禪師碑銘

并序

禪師長老百巖大師之師曰大寂禪師傳佛語心法始  
自達磨至于惠能之化行于南服流于天下大抵以五  
蘊九識十八界皆空猶鏡之明焉雖萬象畢陳而光性  
無累心之虛也雖三際不住而覺觀湛然得於此者卽  
凡成聖不然則一塵瞥起六入膠固循環回復於死生

之中風濤火輪迷忘不息授受昭合大師得之一言宗  
通深入無礙師諱懷暉姓謝氏東晉流寓今爲泉州人  
孩提委發博究書術一旦慨然曰我之祖先今安在耶  
四支百體視聽動用孰使之然耶漼然兩泣故服緇褐  
志在楞伽行在曹溪得圓明清淨之本去妄想因緣之  
習百八句義照其身心心離文字化無方所於是抵清  
涼下幽都登徂徠入太行所至之邦被蒙法味止於太  
行百巖寺門人因以百巖號焉元和三年有詔徵至京  
師宴坐于彰敬寺每歲召麟德殿講論後以病固辭十  
年十二月恬然示滅其年六十其夏三十五弟子智朗

志操等以明年正月起塔于灞陵原凡一燈所傳一兩  
所潤入法界者不可勝書著法眼師資傳一編自雞足  
山大迦葉而下至于能秀論次詳實或問心要者答曰  
心本清淨而無境者非遣境以會心非去垢以取淨  
神妙獨立不與物俱能悟斯者不爲習氣生死蘊之所  
累也故薦紳先生知道入理者多遊焉嘗試言之以中  
庸之自誠而明以盡萬物之性以大易之寂然不動感  
而遂通則方袍袈衣其極致一也嚮使師與孔聖同時  
其顏生閔損之列歟釋尊在代其大惠綱明之倫歟至  
若從師受具之次第宰官大臣之尊信誕生入滅之感

異今皆不書德與三十年前常聞道於太寂聿來京下  
時欵師言頃因哀傷以獲悟入則煩惱不遠菩提雖聚  
散於此生期會歸於彼岸銘曰

西方之教南宗之妙與日並照百巖得之為代導師頰

若琉璃結火燔性愛流溺正癡冥奔命卽心卽佛卽色

卽空師之道一作通今無來無去無縛無解師之化兮揭

茲靈塔丹素周匝示塵劫兮

權載之文集卷第十八

權載之女集卷第十九

唐權德輿字載之

行狀

故司徒兼侍中上柱國北平郡王贈太傅馬公

行狀

曾祖君才皇右武侯大將軍南陽郡公降洛

州治中

祖珉皇右鈐衛倉曹參軍累贈尚書右僕射

父季龍皇大同軍使嵐州刺史幽州經畧副

使累贈司空

汝州郟城縣臨汝鄉石臺里馬燧字珣

唐書作洵

美年七十

太傅英朗特達剛方中正體苞五常致其用以贊皇極  
國有二柄壯其猷以合神武終始盛烈爲唐宗公原夫  
代有勲德延耀儲祉王佐之業至公而光年十四從師  
講學因輟卷喟然曰大丈夫當建功立名以康濟天下  
豈能矻矻爲章句儒耶讀左氏春秋孫吳兵法與歷代  
君臣大本成敗大較忠賢功用竒正方畧會其歸趣如  
指諸掌十九丁內艱泣血三年以孝聞天寶末安祿山  
擁幽陵之師南向以光祿卿賈循爲留後公以畫干循

勸誅逆將向潤客牛庭玠等然後傳檄仗順可覆而取  
之循疑留不決竟及於禍踰月間行至于常山時河朔  
擾攘物情恐懼公方以褒衣居裾游談感激因其謀而  
扶義建節者衆矣寶應中陳鄭節度李涼公抱玉移鎮  
上黨雅知公才表爲晉州趙城尉時王師旣破史朝義  
乃復河洛有迴鶻可汗之助因肆暴而歸以功自負其  
強難屈節將使上介致餼皆懼不敢行公官方解巾急  
病不讓徑詣其壘申明要約氣盛詞直虜皆擾從可汗  
乃授以旗幟委之供辨且曰有犯禁者公其董之於是  
蕃部肅然莫不畏服後有酋長求賂於公者立斬十餘

人可汗大駭疾驅出境安人禁暴之畧兆於斯矣河北副元帥僕固懷恩居將相之重恃父子之勇可汗又其子婿也藉以爲援將有異圖公密覘其情請爲之備初僞范陽節度李懷仙與相衛恒定等四帥相繼來降懷恩結爲黨助奏復其職至是擁衆據汾上子瑒圍太原相魏餽餽以相犄角公至安陽說其帥曰懷恩惜刻以逞欲其子輕佻而好勝人人自爲計坐待帳下之變耳深陳利病勸諭激切由是感公言至涕泣改圖因約懷仙等三人奉章獻欵旣迴鶻北歸懷恩與瑒繼死公之明識遠畧皆此類也本使尋奏改左武衛兵曹參軍厯



太子通事舍人著作郎以至秘書少監兼殿中侍御史  
轉營田節度二判官永泰中拜鄭州刺史兼侍御史至  
是頒六條撫四封分憂於上施惠于下時兵食方調杼  
軸其空公乃闢其田畝均其戶版每歲一稅百姓便之  
生齒益息庶物蕃阜大厯中改懷州刺史其夏大旱公  
以救災沴莫若修教化掩骼埋胔蠲苛恤隱使皆得其  
欲而無窮人端居潔誠默以心禱至七月稻禾滿野庸  
亡者襁負而至朝廷以汧陽被邊宜得文武之守拜隴  
州刺史兼御史中丞公乃訓州師修器備郡城之西有  
路與蕃境相直凡二百餘步上連峻峯公乃躬自行視

塞其蹊隧功堅力省疆場以寧又置譙門於阨陜之地  
中制肩鏑上施干櫓積歲之患旬日而安連帥憚公威  
望日盛羈留幕府因以受代家居京師者久之先皇帝  
召見竒其才受商州刺史兼御史中丞未旬月屬河陽  
三城逐其帥擇可以撫寧之者特拜左散騎常侍兼御  
史大夫充河陽三城使是歲大厯十年也夏五月汴宋  
兵馬使李靈耀以濮陽叛俄據浚郊國家姑務靖人特  
屈常憲因以節度留後授之而又結魏師以畧東都不  
利六月詔公與淮西節度李忠臣夾攻之時寇鋒寢盛  
忠臣每合皆北將奔師以免者數矣公嘗激以壯志或

給之吉夢忠臣旣慙且憤引師復還先是忠臣軍汴南  
公軍汴北每與虜确所向無前初敗之於滎澤又破之  
於西梁固至是靈耀以其勇悍者八千人號爲餓狼營  
盡銳來拒公引戲下決戰遂勝入郟時魏之救兵二萬  
距大梁三十里所公又合諸侯之師用竒設伏以敢死  
士三千人鼓譟先登大敗之魏將軍單騎遁去靈耀以  
其徒宵潰翌日餘黨以城內八千人降於公公悉讓忠  
臣推而不處閉壘移疾退於板橋其士吏鹵獲悉以家  
財購而復之大梁之人至今知感履險則忠以盡敵成  
功則讓以保身此又將師之明哲也十二年三月詔復

魏博之地諸侯班師公乃歸鎮河陽秋雨暴至河流決  
溢軍吏等具檝櫂請公登舟以避公曰城中凡數十萬  
口吾實主之而苟以一家求安所不忍爲也旣而人皆  
感泣水不爲患十四年閏五月皇帝卽位深燭理本以  
太原王業所起國之北門非勲德爛然者不能鎮定特  
拜工部尙書兼御史大夫太原尹北都留守充河東節  
度觀察等使於是修班制正事典險其走集訓其輿師  
講車徒戰陣之法教金鼓聲氣之節分畫之下變化如  
神自是烽候罷警匈奴不敢南向而牧矣建中二年夏  
六月來朝京師加兵部尙書封豳國公初魏博席伯父

之勢而得專地既踰年與東平常山復爲從約七月魏

以兵三萬圍

一作圖

邢州攻臨洛昭義節度使上請公爲

援朝廷許之十月公會昭義之師與神策行營兵馬使  
故大尉西平王於漳州先是魏以浚郊之敗讐公威望  
至是以節制師專征伐之任兵刃完利部校訓齊軍聲  
大振士氣益勵魏人又分銳騎合恒定李惟岳之衆萬  
餘於臨洛南雙崗下樹柵以自固公自晨至晦急擊大  
潰殺其將楊朝光時臨洛之圍場壘四匝復與昭義鼓  
行軍前腹背受敵飈塵翳景士皆決死凡百餘合公自  
據西壕口扼其喉以襲破之兇徒斃踣亂相蹂躪收其

車重兵械各數十萬魏人委營而遁邢圍迎潰上嘉其  
功拜尙書右僕射先是公與軍吏約曰苟戮力成功者  
當場產以賞至是悉索家錢與車服臧獲等莫其價之  
上下視其功之薄厚散於軍中約五千萬且曰苟可以  
夷患難勉師人赤誠之外無非長物故盡其私積賈其  
餘勇士皆歔歔感勵爭以効命報焉優詔褒異命史臣  
書之且詔有司以量入之賦如其數以復於公其毀家  
佐軍輕賞厚下皆此類也三年正月魏人又乞師於東  
平常山衆且四方壁於洹水公曰不備不虞不可以師  
且以河陽三城常所訓定上請爲助有詔從之乃建三

橋夾河爲壘乘變出奇如環無端初則銜枚以趨敵因  
乘其未備後則薙草以滅火使計不得用然後分銳士  
颯馳以犯之而後從之獲首級者殆半餘皆走林溺水  
僵尸相屬腥穢川陸公愀然曰是皆平原人也彼暴服  
之耳亦旣就斃忍其委骨肉如是耶使得以族屬收瘞  
旣而生者知感由是洛博二州僞署刺史各以其地來  
降鄴魏之間以咫尺之書招下二十餘城朱滔誘其隣  
帥復來助寇四月公有魏成之捷五月詔同中書門下  
平章事仍封北平郡王時諸軍連捷師留且久或已一作  
有復其侵地則怠於攻取公具以上聞有詔朔方節度

李懷光應援征討六月朱滔以漁陽之甲三萬至于城  
下初諸侯有議班師者公曰彼三戰三北假息孤城且  
宿兵十萬聞援強而退縱敵生患何以復命於明庭耶  
旣而羣帥相勵皆百其勇七月加魏州大都督府長史  
仍充魏博澶相四州節度招討等使四年二月又敗之  
於成安魏軍退於館陶深壁以自固冬十月盜臣竊發  
鑾輅狩于近郊公忠憤逾迫密圖方畧懷光統朔方之  
旅乘歸心以赴難公齧臂伏泣以大節感動之時朱滔  
招連北虜邊鄙日聳公謂諸將曰夙駕整旅以扈屬車  
人臣之分也儻北都不守卽兩河三川搖矣豈行師扞



患之義耶乃還太原遣行軍司馬王權統銳騎五千與  
監軍使者赴行在又令男彙與大將等男各一人赴焉  
軍實祿賜器備服用一以條奏獻於行宮公初旋師也  
以晉陽大鹵用武之地北蕃東夏且有外虞而都城之  
東平坦受敵乃股引汾晉二川漲爲平湖能順地泐以  
導水勢守陴者歲減其役濱河者日厚其生而又廣堤  
濬池密樹如織金湯自固版幹不勤其明智善利之及  
人也如此公自出車累歲功捷相繼而軍中衣食多出  
寇境河東之人省調給饋餼之勞歲減其賦封內相賀  
因中貴人以聞願刻金石詔從其請公避名不伐懇疏

方止勞謙之詞邦人誦之此所謂尊而光晦而彰也公常揣摹諸侯開導功善能通其變以誘其衷盡益友之直諒啟純臣之志畧因所以建大順立大勲者有焉興元元年二月李懷光貪天犯上衡連逆泚脇其人以河中叛公威聲素振壤地相接支郡屬城降者繼至秋七月皇帝旣平大盜乃清宮廟加河東保寧奉誠等行軍營副元帥有詔許公與諸軍同討河中九月旣望師及於絳僞刺史王克同棄城而遁餘黨來降分猗下縣進軍寶鼎斬其將條伯文先是懷光之師勇於豨突至是獲甲首千數兇徒奪氣矣貞元元年六月公以軍國大

要非章表所盡釋位來朝親稟睿畧乃屈指成算請三  
旬芻粟以平之秋七月與河中節度使今侍中咸寧王  
及同華邠寧之師次于長春宮公以單騎傳于城下召  
大將徐庭光西向受命且以君恩喻之曰兵興已來逾  
三十年而朔方之師最爲忠力今乘時自効若建瓴水  
豈甘心嗇禍終干於鋒刃耶開陳逆順聲涕交感又曰  
跬步之內矢石所及若決爲匪人亦在今日因披襟直  
前當之庭光頰伏拜泣莫敢仰視抗詞未畢堅壁洞開  
公徑入撫定奉宣皇澤於是城中周呼曰吾等復爲王  
人矣八月公與咸寧合軍而東至于焦離堡降其將尉

珪乃次河中陣于城下懷光傳首其衆請命是舉也不  
勞師獻功如其素焉就加侍中歸鎮北都三年二月來  
朝京師寇戎旣清乞罷藩鎮六月拜司徒兼侍中詔有  
司具儀法冊命禮賜備厚昭德報功人臣榮之屯師河  
中也靈武節度杜希全獻體要八事上因著君臣箴以  
賜之公奉表陳賀上又賜公宸扆台衡銘各一首公令  
男暢詣闕謝恩並請揭而書之於起義堂之側詔下優  
答其畧曰卿有訐謨濟代之誠保衡輔朕之志情之所  
尙遂飾以詞比夫盤盂自銘亦冀輔佐同德遂刻石兼  
賜題額寵渥之盛冠耀當時五年九月嘗與故太尉西

平王同對於別殿上曰卿二人與朕休戚是同各賜圖  
形麟閣并製文命皇太子書於閣壁至於君使臣臣事  
君選賢與能之盛盡忠作憲之績煥乎天文與日月並  
命矣九年十月公以足疾久缺朝請因至中書奉表起  
居召對拜舞手愞至地上驚遽自起以接之公慙惶跼  
踖感甚以泣上曰元首股肱本爲同體卿之疾痛何異  
朕身爲遣中使梁懷幹扶掖下殿十三年二月以年及  
懸車再表讓侍中優詔崇獎終不得請八月十七日薨  
於安邑里私第皇帝震悼不視朝四日先是詔宰相詣  
宅問疾御醫禁方旁午於途疾劇遺表指陳邊事純誠

在公言不及私薨之明日詔贈太傅又詔文武百寮就宅弔哭京兆尹護喪萬年令爲副司農卿嗣吳王嚙充弔使鴻臚少卿王權爲副賻贈絹二千疋布五百端米粟二千石二十七日命太常卿裴郁副使少府少監路恕備禮持節冊命上所以待大臣之禮備矣惟公始以文理參佐至于牧守將帥功業見乎變德刑焯於時所以順天明從君命布皇澤宣國威能竭忠力而爲藩衛理軍如家馭下以誠拊循厚而士勵法禁明而衆整誓師鞠旅皆樂爲用料敵制勝如在彀中此戰之所由克也凡再分兵符而三破劇賊開相府十四年以上公居

中者九年至於盡沃心之言當注意之重密啟詭詞人  
莫得而知之昔舜之官人也高作司徒龍作納言惟公  
居之周之命將也方叔元老申伯于蕃惟公嗣之加以  
馮異之推功趙奢之享士子囊之城郢文子之不屬其  
子惟公備之故歲時爲饗追享盛公侯之禮會朝鳴玉  
拜後聯卿士之榮公之展孝也公之敬忠也凡自府辟  
多爲國華登中朝以潤王度分外閩而貞師律公之知  
人也公之舉善也洪範之又用三德嚮用五福惜公不  
踰期頤其他則無不及也德輿自左補闕三歲而爲右  
史掖垣之屬備承功烈褒贈之禮獲奉命書今先遠有

期祖載將及易其名者敢告有司謹狀貞元十一年十月十六日宣德郎守起居舍人知制誥雲騎尉權德輿上尚書考功夫建侯行師先王之所以懲不恪也考行尊名先王之所以勸人臣也謹按故司徒兼侍中上柱國北平郡王贈太傅馬公勤勞王家功德茂盛其謀猷合於君其忠利加於人用登公相以殿邦國今體魄則降日月有時敢錄實行請徵諡法謹上

權載之文集卷第十九



權載之文集卷第二十

唐權德輿字載之

行狀

故朝議郎守太子賓客上輕車都尉賜紫金魚

袋贈太子太傅盧公行狀

曾祖勤嘉皇朝散大夫青州司馬隴城縣開

國子

祖克明皇瀛州高陽縣令贈國子祭酒

父沼皇陝州芮城縣尉累贈慈州刺史秘書

監

河南府洛陽縣遵化鄉恭安里盧邁字子

元年六十

狀公以仁爲經以義爲用宗四教之根本探六籍之菁  
華其門風士行天下歸重以居室之和移諸官署以率  
性之道宏于事業自解巾試吏至佩相印不爲利疚不  
爲物遷令名豐祿與之終始推是道也年未志學累丁  
齊斬純孝孺慕外除猶毀博貫儒書不耀其華特爲叔  
舅太傅文貞公之所賞鑒經明筮仕補太子正字藍田  
尉會府試言拔乎其萃轉河南主簿尋有詔充集賢校  
理建中初上方靖端百度修起五諫拜右補闕俄換侍

御史興元元年遷刑部員外郎間一日又以本官兼侍  
御史介相國蕭公宣慰于江淮奉憂勤之旨宣愷悌之  
澤四牡所及熙熙如春旣復命轉吏部員外郎每歲赴  
調者雜而多端廢置關決在於郎吏情僞之所伏姦吏  
之所因攻堅木導大窾從容折中而優爲之又以京師  
食貧諸孤衣食爲念求出爲滁州刺史仁惻之政人到  
于今懷之朝廷嘉其理行徵入爲司門郎中自時厥後  
比歲超拜厯諫議大夫左曹右轄乃參大政皆用德進  
人無異詞間一歲遷中書侍郎平章事又一歲感風痺  
寢疾周月除太子賓客貞元十四年六月某日薨于家

追命太子太傅公寬舒宏重有姿度風表而憲章品式  
政事成法經通縝密靡不周貫居諫諍之官言必削藁  
自非成命頒行而人莫知者又常以考課之法溢美相  
蒙革其已然當自二府時居左垣固辭上第宰政歎其  
能讓因以從之庶官之濫者知懼而百職循矣燮和台  
階秉直閑邪率循中庸左右皇極德輝陶然不見其際  
詩曰衣錦褻衣裳錦褻裳惡其文之著也公誠有之不  
然豈移疾家居者旬歲上章乞告者七反然後得請至  
於飾終追錫有加禮焉此固有以異于常而得之也早  
歲以游寓于南譙與崔文貞公講學至穀梁傳因附經

義有以規者文貞慙歎爲之著重請銘且曰吾以爾爲  
甥亦以爾爲友知免於大過矣其推重如此天性篤於  
慈仁厚於情禮每居功總之喪其於言而不議議而不  
及樂率皆容稱其服而有加焉故事宰臣非上公承攝  
之禮園丘齋祠之敬則未嘗以騶騎導出國門者公從  
父弟歿於蜀都輜車之來道秦赴洛出東門十數里以  
展哀送度越常檢名教多之其居部也叔父下邳令休  
沐至止朋來憧憧侍食佐酒彌日通夕與羣從之非者  
冠者均其指使章紱之外無以異焉再娶無子或以嗣  
不可絕諭之他求者則曰吾舅文貞常言之矣兄弟之

子猶子也引而進之可以主後故自成童至于捐館其所以留于聰明接于心術者中正之外無自入焉應官俸賜必振六姻之乏卽遠裳帷唯資四布之賻季文之廉忠張仲之孝友魏舒之宏粹孔光之慎密兼而具之日月有時盡徵謚法是用傳信移諸有司謹狀

貞元十四年九月十二日故吏議郎守尚書司勳郎中知制誥雲騎尉賜緋魚袋權德輿謹上尚書考功禮有易名本於周道必視其行勸孰甚焉謹按故朝議大夫守太子賓客贈太子太傅盧公德範貽印如大圭彝器闔門風訓儀表人倫乃持國均以鎮雅俗絜矩居易有

初有終瞻彼九原既徵先遠之卜節其一惠敢忘至公  
之議謹上

唐故大中大夫守國子祭酒潁川縣開國男賜  
紫金魚袋贈戶部尙書韓公行狀

曾祖符皇潭陽郡太守

祖大智皇河南府士曹參軍贈吏部郎中

父休皇太子少保贈司空諡文忠公

京兆府萬年縣芙蓉鄉龍游里韓洄年六

十三

狀公字幼深其先潁川人自同姓於周受封於韓逮獻

子而爲正卿至景侯而開列國司馬氏代家言之詳矣  
八代祖播徙居潁川遂爲潁川人繼有勲力代名忠孝  
以至文忠公用醇仁清德左右元宗致中和以爲國經  
躬愷悌以爲家法公纂承茂緒幼有令聞直方簡重博  
厚宏大該涉羣書尤治春秋詩禮之學必睹其奧而踐  
乎中未弱冠以門廕補宏文生滿歲參調侍郎達奚珣  
矯枉過正以地望降資署章懷太子陵令且將察其詞  
氣以爲銓藻公恬然受署初無愠容當時識者知其致  
遠天寶末盜陷兩京兄侄七人遭離不淑茹痛違難寓  
于江南布衣蔬食不聽聲樂者積六七歲友悌行義士



林以爲難翹車書辟旁午而至累授漢中郡江陵府二  
功曹大理司直兼漢中郡司馬蘇州司馬且皆有賓介  
之請所至之邦待公政成甘于做糲聚其祿廩辨治葬  
具歸于京師七喪祔窆禮無違者名教之士翕然稱之  
洪州刺史張鎬以故相之重作鎮江西奏授本州長史  
莫搖副使懷徠夷落向方率教乾元中江淮凶飢相扇  
嘯聚而新安郡負山洞之阻爲害特甚朝廷推其能名  
除睦州別駕知州事俄拜監察御史又轉殿中侍御史  
賜緋魚袋充江西團練判官軍州庶政多所訪決歲餘  
張終於位公上介領留務時吳楚剽勁法禁未一每長

吏交代人心輒搖公臨以威重撫以慈惠輯寧封部以  
待守臣李梁公峴之充江淮選補使也引爲判官多所  
宏益大厯初轉運使劉尙書晏盛選從事分命四方而  
江淮上流爲之樞會奏改屯田員外郎兼侍御史知揚  
子留後累歲就加司封郎中肅給而有守清明而中節  
有司之移用不匱上國之經費有倫六七年間號爲稱  
職名實益茂徵拜諫議大夫數與左補闕李翰上封章  
極言得失未幾以本官知制誥參掌宥密式敷聲明炳  
然訓辭潤色王度時元載持衡深相器重公愈不自安  
每因災眚必疏古義且以西漢賜上尊酒之比深警戒

之元終不悟竟及於禍公以傍累貶邵州司戶今上踐  
位勵精理本徵爲淮西淮南等道黜陟使復拜朝議大  
夫攝衣登車以澄清風俗爲已任未及行拜權判戶部  
侍郎專判度支賜金印紫綬先是公兄太傅忠肅公實  
居其任受邦國之比要制財用之均節物力不屈王府  
以充出牧也厥職寤廢公乃革煩政振舊綱旣無暴征  
亦無遺利罷省胥吏冗食者二千餘人明年太府卿張  
獻恭廣廩庫以受歲杪量入之數又於長安萬年二縣  
界奏貯米各數十萬石視年之豐耗而爲之發歛人無  
艱食歲無灾荒雖元凱之智畧壽昌之功利不是過也

上方倚以大任爲執事者所抑出爲蜀州刺史蜀多火  
災自古所患俗以爲常無所懲禁公到部逾月令簡事  
時吏胥不勞州兵多暇乃省經用之費給大半之庸俾  
其埏埴以易蓬葦翬飛鳥革相望如雲授之逾年乃償  
其直三歲在郡四封恬然闢田之汙萊三千餘頃復人  
之庸亡二千餘戶教之樹藝俾之生植井絡之下人至  
于今懷之朝廷陟明表課公實居最有詔徵還旣至拜  
兵部侍郎在職數月遷京兆尹兼御史大夫三輔難理  
轂下尤甚賊泚之後旱蝗相乘連師十餘萬屯于蒲坂  
戎裝兵食仰給京師內安罷毗外贍軍實師克濟而人

不困公之力焉轉刑部侍郎刑法者國之大典所以禁  
暴而衛善人也而或巧詆比况因緣爲姦公講求紀律  
明爲式例悉以條奏頒于四方吏無舞文人得從善矣  
遷秘書監乃奏置五經正本補羣書之缺蓬閣之中粲  
然如初復除兵部侍郎累歲改國子祭酒自兵興以來  
多趣末流而弃夷道故學者不振而子衿之詩作焉公  
曰崇化厲賢本于六籍不學將落吾其憂乎乃表名儒  
袁頤韋渠牟列于學官講左氏春秋小戴禮摳衣鼓篋  
之徒溢乎國庠講誦之聲如在洙泗公所至必化其用  
無方方將荷介祉以錫難老亮天工以續舊服人望未

塞以貞元十年二月九日寢疾終于昌化里之私第皇  
情軫悼追贈戶部尙書哀榮之禮于公備矣公有識度  
風鑒而博愛容衆與朋友交死生以之明於吏職能斷  
大事疏達而有節粹和而不流約身以周急絜已而恕  
物先師四教克蹈其全中臺六職常居其半無忌之鎮  
靜安國之忠厚延壽之恩信惟公兼而有之允所謂邦  
之才臣終溫且惠者也龜筮叶吉日月有期易其名者  
請徵舊典謹狀三月日故大中大夫守國子祭酒潁川  
縣開國男賜紫金魚袋贈戶部尙書韓公故吏某官某  
謹上尙書考功夫士之生也躬五常以致用其歿也節

一惠以尊名則善否有章賓實不橈謹按韓公嗣直方  
於舊德播功行於清朝通而有守忠而能力樹善匪懈  
好謀而成課積中臺道光太學大雅明哲惟公有之考  
行飾終古先令典謹撰錄所履布諸有司請徵叔發之  
謚以叶周公之法謹上

權載之女集卷第二十

化國書館

Carhna library



開化圖書館

Kaichua library

開化圖書館

Kaichua library




開化圖書館

Wakuhwa Library

開化圖書館

kaikwa library




權載之文集  
三

開化圖書館  
Kankwa library

開化圖書

kaohua library



**TIFFEN** Color Control Patches

© The Tiffen Company, 2007

Blue

Cyan

Green

Yellow

Red

Magenta

White

3/Color